

قصائد للشاعر المصري الكبير : أحمد فؤاد نجم

الفهرس :

1. حلاويلا
2. جيفارا مات
3. سقطت سايجون
4. يا عرب
5. اتجمعوا العشاق
6. غابة
7. برولوج
8. نكسون
9. هما مين و إحنا مين
10. دلى الشكارة
11. القواد الفصيح
12. عالمحطة
13. البحر بيضحك ليه
14. كلمتين (إلى مصر)
15. فاليرى جيسكار ديستان
16. المنوعات
17. التحالف
18. ورقه .. من ملف القضية
19. أغنية السلام ..
20. يا فلسطينية
21. بوتيكات
22. طلع الصباح
23. المسحراتي
24. بقرة حاحا
25. أواه
26. جائزة نوبل
27. مرحبا
28. نويت أصلى
29. لا نحالف
30. بيان هام
31. دور يا كلام على كيفك دور
32. نشيد الكروان (إلى الشعب)
33. مقابلة صحفية مع الشاعر
34. استغمايه
35. الإضراب
36. مقدمة أبو العلا 90
37. بابلو نيرودا
38. عطشان .. يا صبايا
39. الشاعر الأكره
40. فات الهوى
41. هو شى منه
42. سايجون
43. عنيكى
44. أبو العلا 90 الخاتمة
45. مُر الكلام
46. النيل عطشان

47. ديستان
48. تاجر
49. حرب الشعب
50. الشيخ عاشور
51. دعوة
52. يا مصر
53. آخر الكلام
54. الخط دا خطي
55. بلح ابريم
56. الحمد لله
57. كلب الست
58. شجرة لو
59. أول كلام
60. اصحى يا مصر

حلاويلا

حلاويلا يا حلاويلا .. يا خسارة يا حول الله

ده الثوري النوري الكلمنجي .. هلاب الدين الشفطنجي
قاعد في الصف الاكلنجي ... شكلاطة و كارامبلا ..

يتمركس بعض الايام ... يتمسلم بعض الايام
و يصاحب كل الحكام .. و بسطعشر ملة ..

حلاويلا يا حلاويلا .. يا خسارة يا حول الله

يا حلاولو لو شفتو زمان .. مهموم بقضايا الانسان
بيتكنتك لتقول بركان .. و لا بوتجاز و لا حلة ..

حلاويلا يا حلاويلا .. يا خسارة يا حول الله

اش حالك يا قريب اليوم .. اش جاب التفاح للدوم
و اش جاب الغرفة بيدروم ... للعربية و فيلا

حلاويلا يا حلاويلا .. يا خسارة يا حول الله

جرانين و منابر و ادارة .. و معلق طلبه و زمارة
يعطل أهو ببسلك يابا .. و يجيبوا المنافيلا

حلاويلا يا حلاويلا .. يا خسارة يا حول الله

دا ترستق هلاب الدين .. بقى عاقل جداً و رزين
و يعن عند المجانين .. إن عشنا و متنا بعلة

حلاويلا يا حلاويلا .. يا خسارة يا حول الله

جيفارا مات

شعر : أحمد فؤاد نجم

غناء : الشيخ إمام

جيفارا مات

جيفارا مات

آخر خبر فِ الراديوهات

و فِ الكنايس

و الجوامع

و فِ الحوارى

و الشوارع

و عَ القهاوى وَ البارات

جيفارا مات

جيفارا مات

و اتمد حبل الدارذشة و التعليقات

مات المناضل المثل

يا ميت خسارة عَ الرجال

مات الجدع فوق مدفعه جوّه الغابات

جسدّ نضاله بمصرعه

و من سُكات

لا طبالين يفرقعوا

و لا اعلانات

•

ما رأيكم دام عزكم
يا انتيكات
يا غرقانين
فِ المأكولات و الملبوسات
يا دفيانين
و مولعين الدفريات
يا محفطين (1)
يا ملمعين يا جيمسنا
يا بتوع نضال آخر زمن
ف العوامات
ما رأيكم دام عزكم
جيفارا مات
لا طنطنة
و لا شنشنة
و لا إعلامات و استعلامات
عيني عليه ساعة القضا
من غير رفاقه توّده
يطلع أنينه للفضا
يزعق و لا مين يسمعه
يمكن صرخ من الألم
من لسعة النار فِ الحشا
يمكن ضحك
أو ابتسم
أو ارتعش
أو انتشى
يمكن لفظ آخر نفس كلمة وداع
لجل الجياع (2)

يمكن وصية للي حاضنين القضية

بالصراع

صور كتير ملو الخيال

و ألف مليون إحتمال

لكن أكيد و لا جدال

جيفارا مات موة رجال

يا شغالين و محرومين

يا مسلسلين (3)

رجلين و راس

خلاص خلاص

مالكوش خلاص

غير البنادق و الرصاص

دا منطق العصر سعيد

عصر الزنوج و الامريكان

الكلمة للنار و الحديد

و العدل أخرس أو جبان

صرخة جيفارا يا عبيد

في أي موطن أو مكان

ما فيش بديل

ما فيش مناص

يا تجهّزو جيش الخلاص

يا تقولو ع العالم

خلاص

(1) محافظين : متأتقين

(2) لجل : من أجل

(3) مسلسلين : مربوطين بالسلاسل

اعلى الصفحة

سقطت سايغون (1)

كلمات : أحمد فؤاد نجم

غناء : الشيخ إمام

أبجد هوز .. حطي كلمن
إقلب صفحة .. امسك قلم
اكتب زي الناس ما يتنطق
سقطت سايغون رفعوا العلم

.....

طلعت شمس اليوم ده أغاني
كل ما نسمع نعشق تاني
طلعت شمس اليوم ده حريقة
تكوي الجرح و تبري الالم

.....

سايغون عادت للثوار
فوق الدم و تحت النار
جدّوا فوجدوا .. زرعوا فحصدوا
و إحنا إيدينا للسمسار
و إللي قالوه السمسارية
و الللي حكاه السمساردار

لما قروه القرونجية
بالمستعجل و المندار

هشت و نشت يعزم الصوت
عن أمريكا و هول أمريكا
ز عموا الفانتوم حامل موت
سقط الكوت بعلم أمريكا
جاتكو فضيحة يا طبقة سطيحة
و عاملة فضيحة و جايبة العار
فصحانجية و كلمانجية و سمسارجية
و سمسار دار

[اعلى الصفحة](#)

يا عرب (باللهجة المصرية)

كلمات الشاعر المصري أحمد فؤاد نجم .. و غناء الشيخ إمام

يا عرب .. يا عرب .. يا عرب في أي مصر
يا عرب .. يا عرب .. اسمعوا صوت شعب مصر
أحفظوا لمصر المكان .. و احنا عالعهد اللي كان
مصر أوفى من الزمان ..
و انتو عارفين شعب مصر
يا عرب يا عرب يا أهل مصر

اللي خاتوا العهد بينا .. و استباحوا كل حاجة
و استهانوا بالعروبة .. و استكانوا للخواجة

مستحيل سيكونوا منا .. نحنا حاجة و هما حاجة

هما باعوا الجلاية .. و الوطن و البندقية

و احنا أصحاب القضية ..

احنا ما بنبيعش مصر

يا عرب يا عرب يا أهل مصر

يطلع الدجال بزيفو .. يملا وادي النيل ضباب
ينزل الجراد بسيفو ... يزرع الموت و الخراب
يطول الليل زي كيفو الصباح له ألف باب
و احنا بوصلتنا بايدينا .. ما تخافوش من الليل علينا
مهما غبتو عن عينينا ..

انتو جوا بقلب مصر

يا عرب يا عرب يا أهل مصر

سينا و لا .. يافا و لا .. حيفا و لا ... دير ياسين
اسألوا الشمس اللي هالة .. علي صحيو مبدرين
يزرعوها نور و غلة .. دول جدودنا و لا مين ؟

حقنا و حتماً يُعاد .. بس لو باننت سعاد

و البيان ده لوه معاد ...

و المعاد حيكون في مصر

يا عرب يا عرب يا أهل مصر

[اعلى الصفحة](#)

اتجمعوا العشاق

اتجمعوا العشاق في سجن القلعة ... اتجمعوا العشاق في باب الخلق
و الشمس غنوة من الزنازن طالعة .. و مصر غنوة مفرعة في الحلق
تجمعوا العشاق بالزنازة مهما يطول السجن مهما القهر
مهما يزيد الفجر بالسجانة .. مين اللي يقدر ساعة يحبس مصر

.....

تجمعوا و العشق نار في الدم نار تحرق الجوع و الدموع و الهم
نار تشتعل لما القدم ينضم لما الايادي تفور في لم اللحم
و اللحم منتور في رملة سينا و الكذب بيحجز على أيادينا
قدم العدو غارسة في لحم ترابي ... و الكذب عشش مخبرين على بابي
و المخبرين خارجين كلاب سمرانة ... بيجمعوا العشاق في الزنازة

.....

مصر النهار يطلقنا في الميادين .. مصر البكا .. مصر الغنا و الطين
مصر الشموس الهالة من الزنازين .. هالة و طارحة بدمنا بسا تين
مصر الجنان طرحة مين يقطفها .. مصر الجنان للي يرفع سيفها
مهما يطول السجن مهما القهر .. مهما يزيد الفجر بالسجانة
مين اللي يقدر ساعة يحبس مصر

[اعلى الصفحة](#)

غابة

غابة كلابها ديابا ... و نازلين في الناس هم
و اللي ينام في الغابة ... رح يتاكل هم
و اللي يدور وشو ... في غمضة عين يتهم
و اللي يغيب عن جحرو .. لاجل القوت و المم
يتخان من ورا ظهورو ... او يتاخذ خم
غابة بتاكل مينة ... غابة بتشرب دم

غابة كلابها ديابا ... نازلين بالناس هم
غابة و ناسها غلابة .. خيخة لا ناب و لا فم
متكلين عالصدفة متاكلين بالهم

و احنا يا ملح الغابة .. هم يحرك هم
ضايعين و سط ديابا .. مش فاضيين نهتم

فاهمين و بنتغابا ... مش راضيين نتلم

اعلى الصفحة

برولوج

شعر أحمد فؤاد نجم

يا ليل يا عين ما اعرفش اكذب

طب و اكذب ليه

عدم المؤاخذة

لنا باكتب

و لا أبصر إيه

لا انا احترافي اشتراكية

و لا عندي نزعة رجعية

لكني شايف بعنيه

يا فلاحين يا صناعية

بر الأمان بان

و المركب

راح ترسي عليه

و انا حاكذب ليه

1971

اعلى الصفحة

نكسون

شرفت يانكسون بابا يا بتاع الوترغيت

عملوك ايمة وسيمة سلاطين الفول و الزيت

فرشولك اوسع سكة من راس التين على مكة

وهناك تنفذ على عكا ويقولوا عليك حجيت

عزموك فقالوا تعالا تاكل بابمبون وهريسة
امت لانتك مهيف سدعت انحنأ فريسة
هات وشك خودلك تفة طبعا شلا يا صاحب البيت

خد منى كلام بينالك ولونك موش حتعيش
لاحوول أهلا ولا جهلا ولا تجى ولا ماتجيش
بيقولوا اللحم المصرى مطرح مايسرى بيهرى
ودا كولوا من تأثير الكوشرى والقول أبو سوس بزيت

[اعلى الصفحة](#)

هما مين و إحنا مين ...

كلمات الشاعر : أحمد فواد نجم
غناء : الشيخ إمام

هما مين و إحنا مين .. ؟

هما الأمرا و السلاطين ..

هما المال و الحكم معاهم ..

و إحنا الفقرا المحرومين

حزر فزر شغل مخك

شوف مين فينا بيحكم مين !!؟

.....

إحنا مين و هما مين ..

إحنا الفعلا البنايين

إحنا السنة و إحنا الفرض

إحنا الناس بالطول و العرض

من عافيتنا تقوم الارض ..

و عرقنا يخضر بساتين

حزر فزر شغل مخك

شوف مين فينا بيخدم مين ..!!؟؟

.....

هما مين و إحنا مين؟؟

هما الامرا و السلاطين

هما الفيلا و العربية

و النساوين المتنقية

حيوانات استهلاكية

شغلتهم حشو المصارين

حزر فزر شغل مخك

شوف مين فينا بياكل مين..!!!؟؟

.....

إحنا مين و هما مين

إحنا قرنفل على ياسمين

إحنا الحرب : حطبها و نارها

و إحنا الجيش اللي يحررها

و إحنا الشهدا بكل مدارها

منكسرين أو منتصرين

حزر فزر شغل مخك

شوف مين فينا بيقتل مين..!!!؟؟

.....

هما مين و إحنا مين

هما الامرا و السلاطين

هما مناظر بالمزيكا

و الزفة و شغل البوليتيكا

و دماغهم طبعاً استيكا

بس البركة بالميزاين

حزر .. فزر شغل مخك

شوف مين فينا بيخدع مين..!!!؟؟

.....

هما مين و إحنا مين

هما الامرا و السلاطين
هما بيلبسوا آخر موضدة
و إحنا بنسكن سبعة في أوضة
هما بياكلوا حمام و فراخ
و إحنا الفول دوخنا و داخ
هما بيمشوا بطيارات
و إحنا نموت بالاوتوبيسات
هما حياتهم بامب جميلة
هما فصيلة و إحنا فصيلة
حادي يا بادي يا عبد الهادي
يا اللي عليك قصد الغنواي (الغنوة دي أو هذه الاغنية)

لما الشعب يقوم و ينادي
يا إحنا يا هما في الدنيا دي
حزر فزر .. شغل مخك
شوف مين فينا حيغلب مين

[اعلى الصفحة](#)

دلي الشكارة

دلي الشكارة جنب الشكارة
و أقعد يا حفني ولعلك سيجارة
فكر شوية .. بالعيشة دية
إيه القضية إيه العبارة

من صغر سني

شقيان لكني

ما لظ سني غير البصارة

....

و دخلت حارة من جوة حارة

و فكل حارة عليت عمارة
و سط المعامل بنا و مناوول
بس المقاول كلني بشطارة
و لا خلى صرة و لا لقمة حرة
و العيشة مرة .. آخر مرارة

[اعلى الصفحة](#)

القواد الفصيح

شعر : أحمد فؤاد نجم

القواد : سلمى يا عزيزة على الأستاذ

فنان اليوم و المستقبل

محمود محمود محمود الباز

بنتي السنيورة الأمورة

على فكرة بترقص ممتاز

ارقصي يا عزيزة ما تنكسفيش

محمد بقى منا خلاص و لا فيش

يا عزيزة النيزة كوا النيزه

كان ممكن تطلعي مركيزة

المطيباتية : تكي تم تكي تم تكي تم تم تم

الرقص النقص

يزيح الهم

تكي تم تكي تم تكي تم تم تم

و يمشي الحال

و يجري الدم

تكي تم تكي تم تكي تم تم تم

القواد : على فكره يا كابتن محمود

و برغم الكبت الموجود
انا راجل ثوري و متحرر
و عزيزة بتلعب ع العود
إلعبى يا عزيزة ما تنكسفيش
محمود بقى منا خلاص و لا فيش
يا عزيزة النيزه كوا النيزه
كان لازم تطلعي مركيزه

المطيباتية : ترى لم ترى لم ترى لم لم لم

العود النود

ببزيح الهم

ترى لم ترى لم ترى لم لم لم

و يخلي القعدة

شهية يا عم

ترى لم ترى لم ترى لم لم لم

القواد : أنا رأبي يا سيد محمود

و برغم الصمت المقصود

انك فنان المستقبل

و نشيد العصر المنشود

قربي يا عزيزة من الاستاذ

محمود مبقاش محمود الباز

محمود بقى منا خلاص و لا فيش

قربي يا عزيزة ما تتأخريش

يا عزيزة النيزة

كوا النيزة

انا رأبي

إنك مركيزة

المطيباتية : هلا لم هلا لم هلا لم لم لم

محمود النود

بقى نازل

هم

هلا لم هلا لم هلا لم لم لم

و عزيزة

النيزة

تحب الهم

هلا لم هلا لم هلا لم لم لم

[اعلى الصفحة](#)

عالمحطة

عالمحطة ... عالمحطة

واللي شفته أنا عالمحطة

طلعت الخفة أم شنطة

سلم الأوتوبيس ... بنطة

حتة ملعب (بضم الميم ، أي ذات لعب ودلال) ... والأكاده (أي بالتأكيد)

في الأوام (القوام) والحسن بطة

هيه خشت درجة أولى

والكراسي بيات (بقت أي أصبحت) منطة

سابوا تانية ... وغلب تانية

والأطيع (القطيع) على أولى خطى

اللي يهبش في الجونيلا

واللي يعلى ... واللي يوطى

بص واحد مالي (من الذين) هما دمهم فنفل وشطة

شاف صنايعي في البريمو

آل له خش هناك يا أسطى

تانية أنسب للي زيك

دي الحقيقة بلاش مغالطة

الأسطى آل له ... ياعم روق (بتشديد الواو)

دي الحياة تحب المباشطة
وانت شايف ... مش مغمض
حاجة ملين ... حاجة إشطة (قشدة)
والا يعني الكون حيخرب
لو فقير يلط له لهطة ؟

البحر بيضحك ليه

البحر بيضحك ليه
وانا نازله ادلع املا القتل
البحر غضبان ما بيضحكش
أصل الحكاية ما تضحكش
البحر جرحه ما بيدبلش
وجرحنا ولا عمره دبل

مساكين بنضحك من البلوة
زي الديوك و الروح حلوة
سارقاها من السكين حموة
ولسة جوا القلب أمل
قللنا فخارها إناوي
بتقول حكاوي و غناوي
يا قلة الذل أنا ناوي
ما شرب و لو في المية عسل

والبحر بيضحك ليه ... ليه
وانا نازلة ادلع املا القتل

ياما ملينا وملينا
لغيرنا وعطشنا ساقينا
صابرين وبحر ما يروينا
شايلين بادل العلة عئل

والبحر بيضحك ليه ... ليه
وانا نازلة ادلع املا القتل

في بالي ياما وعلى بالي
واللي بيعشق ما بيالي
ما يهمنيش من عزالي
يا حلوة لو مراسالي وصل

والبحر بيضحك ليه ليه
وانا نازلة ادلع املا القتل

بيني وبينك سور ورا سور
وانا لا مارد ولا عصفور
في ايدي عود قوال وجسور
وصبحت انا في العشق مثل

والبحر بيضحك ليه
وانا نازله ادلع املا القتل

[اعلى الصفحة](#)

كلمتين (إلى مصر)

كلمات : أحمد فؤاد نجم

غناء : الشيخ إمام

.....
كل عين تعشق حلوة
و إنتي حلوة في كل عين
يا حبيبتي أنا قلبي عاشق
و اسمحيلي بكلمتين
كلمتين يا مصر يمكن
هما آخر كلمتين
حد ضامن يمشي آمن
أو مآمن يمشي فين

.....
شابة يا أم الشعر ليلى
و الجبين شق النهار
و العيون بحرین أماتي
و الخدود عسل و نار
و اللوالي (اللؤلؤ) بابتسامتك
يحكوا أسرار المحار
يللي ساكنة القصر عالي
إيمتي يهنالي المزار
كلميني يا صبية
طال عليّ الانتظار
كلمتين يا مصر يمكن
هما آخر كلمتين
حد ضامن يمشي آمن
أو مآمن يمشي فين

.....
قصرك المسحور غيلانو
أغبي من دود الغيطان
بعد مص الغصن الاخضر
ينحتوا عضم العيدان

و اللي خلى الارض خضرا

و اللي خلى الدار آمان

عاش بجور ملو جوفه

مات بخوفه من الغيلان

طوع الغلبان

ما قالش عن شقا العمر اللي كان

كلمتين بمصر بيقوا

هما آخر كلمتين

حد ضامن يمشي آمن

أو مآمن يمشي فين

.....

أدي كلمة من عذابي قلتهاك

باقي كلمة

من حنيني صنتهاك

في الضلوع من دنيا ظلمة

كنت خايف يلحوها

يقتلوها في سكة ظلمة

سقسقت و النور بشاير بشاير

زهرة الصبار يا سلمى

يا نسيم الشوق يا طاير يا طاير

خد لمصر في الصبح كلمة

طول ما يبقى الركب ساير

بالبصاير و العينين

يبقى ضامن يمشي آمن

يبقى عارف يمشي فين

[اعلى الصفحة](#)

.... فاليري جيسكار ديستان ...

فاليري جيسكار ديستان
والست بتاعه كمان
حجيب الدير من ديله
ويشبع كل جعان
ياسلامم يا جعان
ع الناس الجتلمان
داحناحتمنجه واصل
وحتبقى العيشه جنان
التلفزيون حيلون
والجمعيات تتكون
والعربيات حتمون
بدل البنزين برفان
وحتحصل نهضه عظيمه
وحتبقى علينا القيمه
فى المسرح أو فى السيمما
أو فى جنينة الحيوان
وحتبقى الأشيا زلابيه
ولاحوجه لسوريا وليبيا
وحنعمل وحده أرابيا
مع لندن والفاثيكان
والفقرا حيكلوا بطاطا
وحيمشوا بكل الأاطه
وبدال ما يسوا شلاطه
حيسموا عبالهم جان
ودا بفضل صديكي (صديقي)
ديستان الرومنتيكي
ولاحدش فيكو شريكي
فى المسكن والسكان

الممنوعات

ممنوع من السفر

ممنوع من الغنا

ممنوع من الكلام

ممنوع من الاشتياق

ممنوع من الاستياء

ممنوع من الابتسام

وكل يوم فى حبك

تزيد الممنوعات

وكل يوم باحبك

اكثر من اللى فات

حبيبتي يا سفينه

متشوقه و سجينه

مخبر فى كل عقده

عسكر فى كل مينا

يمنى لو أغير

عليكى أو أطيّر

بحضنك

أوأنام

فى حرك الوسيح

وقلبك الربيع

اعود كما الرضيع

بحرقه الفطام

حبيبتي يا مدينه

متزوقه وحزينه

فى كل حاره حسره
وف كل قصر زينه
ممنوع من انى اصبح
بعشقتك او ابات
ممنوع من المناقشه
ممنوع من السكات
وكل يوم فى حبك
تزيد الممنوعات
وكل يوم بحبك
اكثر من اللى فات

القاهرة / 1976

[اعلى الصفحة](#)

التحالف

يعيش اهل بلدى
وبينهم مفيش
تعارف
يخلى التحالف يعيش
تعيش كل طايفه
من التانيه خايفه
وتنزل ستاير بداير وشيش
لكن فى الموالد
يا شعبى يا خالد
بنتلم صحبه
ونهتف يعيش

يعيش اهل بلدى
يعيش النثقف على مقهى ريش
يعيش يعيش يعيش
محفظ مزفظ كثير الكلام
عديم الممارسه
عدو الزحام
بكام كلمه فاضيه
وكام اصطلاح
يفبرك حلول المشاكل قوام
يعيش المثقف
يعيش يعيش يعيش
يعيش اهل بلدى
يعيش التنابله
فى حى الزمالك
وحى الزمالك
مسالك مسالك
تحاول تفكر تهوب هنالك
تودر حياتك
بلاش المهالك
لذلك
اذا عزت توصف حياتهم
تقول الجياه عندنا
مش كذلك
وممكن تشوفهم فى وسط المدينه
اذا مر جنبك
أتومبيل سفينه

قفاهم عجينه
كروشهم سمينه
جلودهم بتضوى
دماغهم تخينه
سنانهم مبارد تفوت فى الجليد
ما فيش سخن بارد
بيكلوا الحديد
ما دام نهر وارد
وجاى م الصعيد
تزيد الموارد
كروشهم تزيد
وتسمع وتسلم
بأن التنايله
أو الأكلين
حيسمع كبيرهم
ويعمل مقابله
مع الفلاحين
ويحصل تحالف
ما بين الجميع
ونملا المصارف
بدم القطيع
أطيع الخليفه
وأطيع والديك
دا مفروض عليك
تزرع وتبعت لحي الزمالك
وحي الزمالك

مسالك مسالك

تحاول تفكر تهوب هنالك

تودر حياتك بلاش المهالك

لذلك

أذا حد جابلك سيرتهم

تبسمل تكبر

وتهتف كذلك

يعيش التناوله

يعيش يعيش يعيش

يعيش اهل بلدى

يعيش الغلابه

فى طى النجوع

نهارهم سحابه

وليلهم دموع

سواعد هزيله

لكن فيها حيله

تبدر تخضر جفاف الربوع

مكن شغل كايرو

ما يتعيش دايره

لا ياكل

ولا حتى يقدر يجوع

يا غلبان بلدنا

يا فلاح ياصانع

ياشحم السواقى

يا فحم المصانع

يا منتج

يا مبهج
يا آخر حلاوه
يا هادى
يا راضى
يا عاقل
يا قانع
ما تتعيش عقلك
فى شغل السياسة
وشوف انت شغلك
بهمه وحماسه
وعود عيالك فضيلة الرضا
لأن احنا طبعاً
عبيد القضا
ورزقك ورزقى ورزق الكلاب
دا موضوع مؤجل ليوم الحساب
كمان الصحافه
جنكذب فى حالتك
وتنشر مناظر لخالك وحالتك
وتتطلع يامسعد عليك الغناوى
وتسمع بأسمك
فى قلب القهاوى
تحبك مشيره وبنات الجزيره
وقصة غرامك
تشيع فى الرداوى
يعيش عم مسعد
يعيش يعيش يعيش

ورقه .. من ملف القضية

انت شيوعى

انا مصراوى

انتومصايب

انتو بلاوى

ممکن اعرف مين الأول

بيكلمنى

احنا نيابة أمن الدولة

دولة مين

دولة مصر

مصر العشه

ولآ القصر

أيوه حنبدى ندور ونلف

حاجه تنرفز خالص

اف

مالك.. شايل طاجن خالك

لم لسانك ما تخرفش

أنا ما اقصدش اهانتك طبعاً

ايوه استعبط

لا ما اعرفش

ايه رأيك فى سفارة كوريا

ايه رأيك فى قضية مصر

مصر فى وحده

هى وسوريا وليبيا

ولازم بيحي النصر
بيحي منين و ازاي ولمين
آدي كلام الشيعيين
أنا من حقي
حق في عينك
أنا بتكلم بيني وبينك
يعني كلام بره التحقيق
اذا كانش يسبب لك ضيق
طيب فول
مين مسؤل ؟
مين مسؤل عن ايه يا أخينا
ع اللي جري لنا ف غزه وسينا
أنت شيعي أكيد وطاوعني
فض دمغك من دي قضيه
شعبنا جاهل
مهما تقول له
مش حيا من بالشيعيه
ما الشيعيه في فيتنام
ايه رأيك فيهم يا همام
مش بطل مش بطل
لكن احنا .. ورانا عيال
طب ما نحارب
لجل عيالنا
يطلعوا أسعد من اجيالنا
انت الظاهر مخك فاضي
وحتتعبني معاك ع الفاضي

وأنا بحبت معاك بكفايه
ابقى اتفلسف عند القاضى
هى قضية ؟
لأ ملوخية
آمال فاهم ايه آمال
هى الدولة دى لعب عيال
ممکن أعرف أنا هنا ليه
أيوه حتعرف
آمال ايه
يوم خمسه وعشرين الماضى
ايه مشاك عند التحرير
تحرير ايه يا جناب القاضى
أنا مش فاضى
بكره تصوير
بطل غلبه وجاوب دوغرى
أنا غلباوى كده من صغرى
كل الشيوخ عيين امثالك
آخر غلبه وقلة ذوق
يحصل ايه لو تمشى فى حالك
فاكر نفسك مين
ما تفوق
لو راح افوق
مش من مصلحتك
أما معجب جدا بصراحتك
أيه رأيك فى حكاية الطلبة
حاجه عظيمه بشرة خير

انت دماغك ينفع جزمه
وانت لسانك ينفع سير
أخرس قطع لسانك سافل
كتر خيرك
مخك قافل
مين وداك بقى عند الطلبة
رايح ضمن المندسين
رحت أناقشهم واسمع منهم
تسمع منهم ايه ياسى طين
دول عايزيين الدنيا تولع
علشان اصلا
مش فاهمين
هى الحرب يا عالم لعبه
دى بتتكلف بالملايين
وانت حتدفع ايه من جيبك
امال حدفع من جيب مين
انت حمار وخدوك فى مشمك
رحت هناك زى الباقيين
عاملين لجنه
وقال وطنيه
مش ممكن دول وطنيين
وجماعة انصار الثورة
وفلسطين وهباب الطين
ما نخلينا يا سيدى فى حالنا
مالناومال الفدائين
هو احنا اللى نهبنا بلدهم

دول عالم صيغ فاقدين
قتلوا الراجل عند الشيرتون
واحنا اللى طلعلنا القاتلين
وصفى التل ده كلب وخاين
اهو كل العالم خاينين
واحد صاحبي مراته مرافقه
وهو مرافق
بيجي عشرين
أمريكا بتزعل وبتحزن
هو احنا يا عالم ناقصين
مش نستعبر
م اللى جراننا
ونعيش بقى زى العايشين
دى عيال عملا للشيو عيه
واحنا عدو الشيو عيين
روق دمك بس يا بيه
مين مساعدكو بفالو سنين
بيساعدونا صحيح يا سى بعجر
علشان أصلا مش فاهمين
احنا حليتنا منين نديهم
ونسدهم بالملايين
يمكن يعنى قضية مبدأ
مبدأ مين وزكايب مين
هى دى عالم تعرف مبدأ
دول بقول لك
ناس مجانين

اختر عولنا السد العالى
علشان نبقى اشتراكيين
اشتراكيه هناك فى بلدهم
واحنا فى دارنا
نعيش حريين
عايزيين الفلاح الجاهل
يتساوى بالمحترامين
وكمان قال
تحديد ملكيه
أبو ألفين
يدوه خمسين
شغل ملاحده وعالم كفره
ومخالفين احكام الدين
والعمال راخرين اسم الله
فاهمين روحهم
بنى آدميين
ناس عايزين الحرق بولعه
دا كله من الشيوعيين
نشروا لنا الأفكار السوده
أولاد الكلب الملاعين
مين وداك بقى عند الطلبة
انطق قول
اتكلم مين
هما ايه مطالبهم ؟
انت حتستجوبنى يا شاطر
لأ مش قصدى

بس أنا بسأل
كانو طالبين كراريس ومساطر
ولا مطالب ميه الميه
كل الشعب مآمن بيها
دول طالبين حرب وشعبيه
مين مجنون بقى
حيمشيها
عايزين يدوا الرتش سلاح
عشان تحصل فيها مجازر
أنا لو أشوف حلوف فلاح
شايلى شومه
لازم اهاجر
لازم بينه وبينك دم
دم ف عينك
هس اتلم
ثم نحارب ليه
وبأيه
بسلاح ما يموتش بعوضه
روق دمك بس يا بيه
الحرب ضروره ومفروضه
واهو نفس سلاحنا المظلوم
فى فيتنام دابح أمريكا
دى طبيعه أرض يابتي آدم
بطلوا بقى كذب وبولوتيك
طب ما الهند بنفس سلاحنا
فى باكستان

بعزقت الغرب
رأيك يعنى ضرورى ان احنا
وحتما يعنى نخش الحرب
طيب
حاضر
فين المخبر
حتغير رأيك
بالضرب يناير
1973

[اعلى الصفحة](#)

أغنية السلام ..

يقول الشيخ إمام في بداية الأغنية موضحاً (أنا بدي أبينلكم موقف الشعب المصري من السلام) ..

.....

بانوراما الدنيا فونية .. صندوق الدنيا عصري
الصورة من أميركا .. و الصوت من جوا مصري
لو تفهم كل قصدي .. أو هبلك نص قصري
و اكتبك الوصية .. على جناح الحمام
و اتفرج يا سلام لم .. و اتفرج يا سلام

....

شوف عندك يا سلام لم .. و اتفرج يا سلام
هزلية مرسحية .. على تياترو السلام (تياترو : المسرح)
سلام كلام أغاني ... و عليكم السلام
ما عاد على الغلابة عايد غير الكلام

و الحالة كل مادا يا سادة يا كرام
و اتفرج يا سلام لم .. و اتفرج يا سلام

.....

سالمة يا سلامة .. و دليلة رجعت بسلامة
مصرية و من مواليد شبرا .. من تحت نفقها و مجاريها
لو كانوا ما حرقوش الاوبرا .. كانت حتللع لياليها
بالغوة المدهونة شفايف .. غرقانة و سايحة ببلاويها
سيد درويش اللي حيلتنا .. سرقوه و باعوه بيعة ندامة
سالمة يا سلامة .. و دليلة جات بالسلامة ..

....

سالمة يا سلامة .. كوكا كولا جات بالسلامة

نشروا الاعلان ... ملو الجرنان

جوا البراويز الذهبية

و التلفزيون بالصوت و اللون

كوكا كولا هي الاصلية

اشرب يا خفيف .. بطل تخاريف

بلا طيز الطور بلا وطنية

كوكا كولا تفوق و تروق ضد الافكار الهدامة

سالمة يا سلامة .. طير بينا و رفر ف يا حمامة

سالمة يا سلامة .. على مصر الثانية أم علامة

[اعلى الصفحة](#)

يا فلسطينية ..

.....

يا فلسطينية و البندقاني رماكو ..
بالصهيونية تقتل حمامكو فِ حماكو
يا فلسطينية و أنا بدي أسافر حداكو
ناري بإيديا و إيديا تنزل معاكو
على راس الحية و تموت شريعة هو لاكو

.....

يا فلسطينية و الغربية طالت كفايا
و الصحرا أنت من اللاجئين و الضحايا
و الارض حنت للفلاحين و السقايا
و الثورة غاية و النصر أول خطاكو

.....

يا فلسطينية و الثورة هيّ الاكيدة
بالبنديقية نفرض حياتنا الجديدة
و السكة مهما طالت و بانث بعيدة
مد الخطاوي هو اللي يسعف معاكو

.....

يا فلسطينية فيتنام عليكو البشارة
بالنصر طالعة من تحت مية ألف غارة
و الشمعة والعة و الامر كان بالخسارة
راجعين حيارى عقبال ما يحصل حداكو

[اعلى الصفحة](#)

بوتيكات

بوتيكات النات كوا النَّات

وشقق مفروشہ وعمولات

يا حلاوه الناوه كوا الناوه
يا بلدنا يا آخر فتاكات
بوتيكات النات كوا النات

**

شبيك لبيك فتح مخط
لبيك شبيك غمض عينك
حتفقل مخك ح نطحك
ونلوشك لو تفتح عينك
ركب قرنين تركب مازدا
وتعيش سلطان في البرواز دا
مش عاجبك فالجينه الفازده
والعيش والبول والكرات
يا حلاوه الناوه كوا الناوه
يا بلدنا يا آخر فتاكات
بوتيكات النات كوا النات
مين فيكوا ما يعرفش عليه
شيال المنيا الكحيان
في ثواني اتمول واتحول
بقي مسيو عليه عليان
إزاي؟

ما هي بوظه ومفتوحه
على حس ولاد المفضوحه
وأرانب صاحيه ومدبوحه
تتأستك تبيع البنوكات
يا حلاوه الناوه كوا الناوه
يا بلدنا يا آخر فتكات

بوتيكات النات كوا النّات

**

حتقول الفقرا ومشاكلهم
دي مسائل عايزه التفانين
وأنا رأيي نحلها رباني
ونموت كل الجعانيين
وبهذا ما حشد

ح يجوع

لو نعلن هذا المشروع
وح نقفل هذا الموضوع
نهائياً

ونعيش في تبات
يا حلاوه الناوه كوا والناوه
يا بلدنا يا آخر فتكات
بوتيكات النات كوا النّات

سجن الاستئناف/ 1981

[اعلى الصفحة](#)

طلع الصباح

كلمات احمد فؤاد نجم ,,,,,,,,,, غناء الشيخ امام

طلع الصباح كل الجمال في طلعه
والنور سرح كحل عينينا بفتنته
والطير صدح للمولى جئت قدرته
الحن جميلة تنعش القلب الحزين

يسعد صباحكم كلكم يا شغالين
الشمس طالعة بابتسامة الأمل
شعلة ياقوت زي الخدود وقت الخجل
بتقول يا نايم قوم بدا وقت العمل
دي الدنيا خيرها وعزّها للشقيانين
يسعد صباحكم كلكم يا شغالين
يا ولاد بلدنا من جنوبها لشرقها
يا مشمرين عن السواعد كلها
النور حزن بلادنا و ضمّها
والشمس هلت بالامل ع الشقيانين
يسعد صباحكم كلكم يا شغالين
طلع الصباح كل الجمال في طلعه
والنور سرح كحل عينينا بفتنته
والطير صدح للمولى جلت قدرته
الحان جميلة تنعش القلب الحزين
يسعد صباحكم كلكم يا شغالين

[اعلى الصفحة](#)

المسحراتي

حبلت الايام سنين
ولدت الايام دهور
دامت الايام لمين
وحدّوا المولى الغفور
صلي ع اللي في القيامة يشفّعك
واصحى يللي نمت من اللي بيوجعك
واكشف اللي بيؤلمك و بيمنعك

وانده اللي لو ندهته يسمعك

قول يا جارة

قول يا جار

مهما طال الليل وجار

كل جرم وله مدار

و الكواكب دوارين

وحّدوه يا مؤمنين

صحّي نومك يا اسطى فكري يللي ناسي

هلّ يومك يا اسطى مرسي يللي راسي

يا حبايب مصر يا أهلي يا ناسي

اللي يعشق بالسهر حتما يقاسي

اصحى يا نايم كفاية

وحّد الانسان معاي

طالت الليل الرحايا

والحدادي قلقانين

وحّدوه يا مؤمنين

.....

يللي صاحيين في البيوت

يللي كاشفين المكان

يللي سامعين السكوت

يللي واعيين للزمان

استعدوا للقيام

استعدوا للقيام

واقبلوا مني الكلام

مصر نائمة من سنين

وحّدوه يا مؤمنين

بقرة حاحا

.....

ناح النواح و النواحة
على بقرة حاحا النطاحة
و البقرة حلوب .. تحلب قنطار
لكن مسلوب .. من أهل الدار
و الدار بصحاب .. و حد عشر باب (11 باب)
غير السراذيب .. و بحور الديب
و غيلان الدار .. واقفين بنهار
و ف يوم معلوم ... عملوها الروم
زقوا الترياس ... هربوا الحراس
دخلوا الخواجات .. شفتوا اللبنات
و البقرة تنادي .. و تقول يا ولادي
و ولاد الشوم ... رايعين ف النوم
البقرة انقهرت .. م القهر انصهرت
وقعت بالبير .. سألوا النواطير :
طب وقعت ليه ..؟
وقعت م الخوف
و الخوف يجي ليه .. ؟
من عدم الشوف
و وقعت م الجوع و م الراحة
البقرة السمرا النطاحة

ناحت مواويل النواحة
على حاحة و على بقرة حاحا

اعلى الصفحة

أوأه

هذه القصيده للمرحوم الرئيس انور السادات كلمات أحمد فؤاد نجم وغناء الشيخ امام

أوأه المجنون أبو برقوقه
غيره وبرانى وملزوقه
نصاب ومنافق ودماغه
مليانه مناطق موبوءه
والنكته كمان انه طننجى
وعامل لى فكاكه وحنذوقه
مع ان الحجش أفهم منه
والعالم فهمه ومفلوقه
بسلامته بيسرح قال بينا
يعنى احنا مواشى يا زقزوقه
داحنا العريفه الحريفه
غيرش الايام المدعوقه
شفت الولدات الشلبيه
ليلة التحرير يا أسطى فاروقه
أهو دولا ولادنا وأكبدنا
وقلوبنا عليهم مشقوقه
يا سلام يا صلاة النبى احسن
إلى حيل العلم يا مرزوقه
حلوين وحياتك يا بلدنا

يا أم الخيرات المسروقه
احنا اللى رمينا البذرايه
وروينا الارض المعزوقه
وحنصد بكره وحنغنى
وعيون الخاين مخزوقه

القاهرة / 1973

[اعلى الصفحة](#)

جائزة نوبل

كلمات أحمد فؤاد نجم وكتبها بمناسبة معاهدة السلام وحصول مناحم بيجن على جائزة نوبل

شوف عندك يا سلامم
واتفرج يا سلام
مواطن شخص عادى
مالوش اى اهتمام
ومبارك الخيانه
ومسميها السلام
وف يوم قرا الجرايد
تاريخ ما اعرفش كام
من يومها يا ضنايا
بيشقلب فى الكلام
واتفرج يا سلامم
اتفرج يا سلام
على شقلب يا سلام
لنا محاتم جيبين يادخ
زايجة لوبن
يعنى مناحم بيجن

ياخذ جايزة نوبل
تبقى النوديا يعنى الدنيا
ماشيه بتحدف بالمندار
يبقى الشهر اتناشر ساعه
يبقى اليوم ليلتين ونهار
يبقى القاتل شحص ضحية
والمقتول مجرم جبار
شفتوا ازاي ؟
اما صحيح الطب اتقدم
وحنا ما وصلناش أخبار
أيوه يا لجنة لوبن بيه
قاعدة بتلجنى ايه
أنا مش فاهم حاجه صراحه
لما القاتل ياخذ جايزه
كده من دون تليخ وأباحه
يبقى يا أما اللجنه دى بايظه
او لامؤاخذه رئيسها حمار
يبقى يا لجنه يا عره يا كوسه
جتنا وجاتكو ستين حوسه
تبقى ف هذا الزمن المايل
ياما حنجري علينا هوايل
تبقى اللكمه بدل الكلمه
والكاتب يمسك منشار
يبقى الراعش يعنى الشاعر
يسكن شقة فى بيت ف قصيده
يكتب فول ياكل أشعار

اعلى الصفحة

مرحبا

بعد السلام والمرحبا

يا اولاد بلدنا يا طيبين

نفرش كلام المصطبة

واضح لكل السامعين

مصر الحبيبة الطيبة

أم البنية (بتشديد الياء) والبنين

ايش حالها في عز الصبا

ايش حال ولادها المخلصين

وسط العواصف مركبة (سفينة)

بين ريح شمال وريح يمين

جابوا الطبيب ابن الحلال

كشفت مكان الداء وشافت وقال

أهل البصيرة في البلد

جواب لكل السائلين

قال البلد عاوزه ولد

ياخد بطار (تأر) المظلومين

ولد يعوض اللي راح

ويعلا فوق كل الجراح

ويمد إيده في الضباب

يشد أنوار الصباح

فيكم ولد يا سامعين ؟

(يرد الكورس): أجدع ولد

طب هوه فين ؟ وهوه مين ؟

كورس: ابن البلد

يا ابن البلد يا ابن البلد

الوقت وقتك يا ولد

يا قلب مصر ونبيضا

كورس: يا ابن البلد يا ابن البلد

يا صباحها

كورس: يا ابن البلد

يا ربحها

كورس: يا ابن البلد

يا قمحها

كورس: يا ابن البلد

يا رمحها

كورس: يا نور سماها وأرضها

أدي كلام المصطبة يا اولاد بلدنا يا طيبين

بعد السلام والمرحبا واضح لكل السامعين

=====

أنشد الشيخ رحمه الله هذه الأنشودة في طلبية الجامعة قبيل حرب 1973 فألهب مشاعرهم الوطنية وأتي هدير صوتهم واضحا في خلفية التسجيل . كان يطالب بقائد من بينهم يقود ثورة جديدة تقلب النظام وتصحح الأوضاع .

لا أكون مبالغا إن قلت أن خوف النظام من ثورة شعبية في تلك الفترة ربما يكون قد عجل بالحرب .

[اعلى الصفحة](#)

نويت أصلي

نويت أصلي ... نويت أصلي ...

نويت أصلي صرصور دخل لي

هرش لي مخي قعدت أفلي (أي وقفت حائرا أقلب الأفكار ، أفلي من التفلية أي البحث عن القمل بالرأس)

خربوش خرابش ... صرصور مهابش (صرصور شقي ذو هبش وخربشة)

وفضلت أهابش ما حد دلي (ظللت أكافح وأحاول دون أن يدلني أحد)
حليت رباطي من تحت باطي 0 الباط هو الإبط)
لا قدرت أطاطي ولا طلت أعلي (لم أقدر على الوقوف أو الانحناء)
حيران يا حالي سهران ليالي
وسنين بقالي مربوط في ضلي (كيفما تحرك ظلي تحركت معه)
وسألت قال لي شيخنا المصلي
اركع تاراته اسجد تراللي (تاراته وتراللي نغمات موسيقية تفيد رتابة الوتيرة والتكرار)
يارب ياللي ... يارب ياللي (ياللي : يا من)
زرعت عودي سارح تملي (أقمت جسدي كنبات ينمو دوما باستقامة)
وعدلت ضهري فوق سرج مهري (وأقمت ظهري شامخا فوق حصاني)
وطبعت زهري على خد خلي (ومكنتني من طبع قبلي على خد حبيبي)
وحياة معيشتي متعب ومشقي (أحلف بمعيشتي التي ربما كانت سبب شقاء للآخرين)
مهمن (مهما) جري لي مهمن حصل لي
لاوهب حياتي واوصل صلاتي (لأهبن حياتي كلها في صلاة متصلة)
والآتي آتي في يوم تجلي (وليكن ما يكون يوم تتجلى لي ذاتك العلية)

[اعلى الصفحة](#)

لا نحالف

لما نحالف لا نحالف إلا الأختيار
لما نحارب لا نحارب إلا الفجار
دارنا هنا حرة و إحنا فيها أحرار

.....

يللي دمانا المهذورة سفكتها يداك
يللي بلادنا المحتلة إحتلتها قواك
لك عهد الله لا نسمعلك و لا نمشي وراك
و لا نذهب شرقي و غربي و لا يمين و يسار
دارنا هنا حرة و إحنا فيها أحرار

.....

يا مشرد في البرية شعب فلسطين
و دبحت الشعب العربي دبح السكين
لنخاصم لجل (لاجل) عيونك روسيا و الصين
ولا نقبل صدقة و رشوة بجنيه و دولار
دارنا هنا حرة و إحنا أصحاب الدار

.....

يا مغرور يللي غرك إكرام الضيف
لو تعرف مين العربي في يوم الحيف
لا يحاور و لا يتكلم إلا بالسيف
لما نحالف لا نحالف إلا الاخير
لما نحارب لا نحارب إلا الفجار

اعلى الصفحة

بيان هام

هنا شقلبان

محطة اذاعة حلاوة زمان

من القاهرة ومن كردفان

وسائر بلاد العرب واليابان

ومن فنزويلا أيضا ايران

ومن اى دار

أو بلد مستباحه

بفعل السياحه مع الأمريكان

هنا شقلبان

محطة اذاعة حلاوة زمان

نقدم اليكم بكل اللغات

مراسح وسيما وجميع الفنون

صحافه ومناير وتلفزيونات

وخطبا ف جوامع وجبنه وزيتون

ونقزح ونركب جميع الموجات

ونبحث ونفهم فى كل الشئون
ودايما نلعلع فى كل الحالات
ولا حد سامع ولا يحزنون
وتسمع ما تسمع دا ما يهمناش
لأن احنا اصلا بناكل بلاش
فخليك فى نفسك وما تخليناش
نسلط عليك القلم واللسان
هنا شقلبان

محطة اذاعة حلاوة زمان
يسر الذاعه ولا يسركوش
بهذى المناسبه ولا بندعكوش
نقدم اليكم شحاته المعسل
وبدون الرتوش
شبندر سماسرة بلاد العمار
معمر جراسن للعب القمار
وخارب مزارع و تاجر خضار
وعقبال أملتك أمير الجيوش
ما تقدرش تنكر
تقول ما اعرفوش
ما تقدرش ايضا تقول ما أسمعوش
شحاته المعسل حبيب القلوب
يزيل البقع ولاهموم والكروب
يأنفس يأفين يبلع حبوب
ويفضل يهلفط ولا تفهموش
وتفهم ما تفهم دا ما يهمناش
لأن انت فاهم وعامل طناش

ح تنكر وتحلف ح اقول لك بلاش

ح تتعب دماغنا وتتعب كمان

هنا شقلبان

محطة اذاعة حلاوة زمان

لأن المخبي ظهر واستبان

وكل المسائل بدت للعيان

وظلعت حكاوى ونزلت كمان

عن التهريبيه وعن كيت وكان

وعن محسوبيه وعن ألعبان (بضم الالف)

ظهر فى المدينه كأن الطوفان

وغرق مراكب وسوح غيطان

وبعض المراكب ح تغرق كمان

وأزمة مساكن وأزمة أمان

وعالم بياكل فى عالم جعان

وريحة مؤمره فى جو المكان

مخطط خيانه مع الأمريكان

لدبح العشيره وحرق المكان

وفيه ناس بترغى ولازم بيان

كما ابلغونا جميع الودان

لهذا وذاكا وتلكم كمان

نقدم اليكم عروسه وحصان

شحاته المعسل وهذا البيان

هنا شقلبان

محطة اذاعة حلاوة زمان

بسم الله

سلام عليكم وسلمون وموز

وأما المسائل فهنجف ولوز
فيا اخوتى ويا أخوات
اليكم بيانى كما هو آت
جميع المسائل تمام التمام
وكل الكلام دا مجرد كلام
فصبرا جميلا ولا تفلقوش
وشغل الضغائن أنا ما أقبّلوش
ما فيش أى حاجه
على الطلاق والعتاق بالتلاته
ما فيه اى حاجه
وقدر كمان ان فيه أى حاجه
ما لوش أى لازمه الكلام واللجابه
وعيب ان عيل يسوق السماجه
ويعمل لى باللو ويعمل ديباجه
أنا بطبعى ضد السماسره الكبار
بحكم المنافسه وحكم الجوار
لكن مش فى طبعى
انى أعمل فضيحه
لو احد زميلى هبش كام صفيحه
ما كل الزمايل بتهيش صفايح
وكل اللى جاى مش زى اللى رايح
فيا ايها الشعب صهين تفلعص
مساء التنفس مساء الروايح
أخويا الامير بزرميط الايرانى
بعث لى السنه دى
عزمنى ودعانى وأنا قبلت طبعا

ورحنا العزومه وكانت وليمه
ما تحصلش تانى دا أيه المحمر
وأيه المكمر وايه المشمر
وايه الصوانى
وانا دماغى تعبت ولفت صراحه
من الفخفه والهنا الاصفهانى
هناك يعنى مثلا اذا شربت طافيه
تمز بكوارع وبسطرمه ضانى
ما شفتش هناك
ناس بتحقد عليهم
ولا ناس بتشتتم فلان الفلانى
لأنه اشترى عزبتين من شطارته
وحكمة ادارته وطلع مبانى
وبعد الوليمه استلمنا الهدايا
مفضض ومدهب وقز وقيشانى
وطبعا أخويا الأمير قال لى حاجه
ح اقولها لكو طبعا اذا الوقت ناسب
ح يطلع لى عيل بدون اى حاجه
ويعمل لى فلحس ويقعد يحاسب
دا حقد اشتراكى أنا ما أقبلوش
ولو هو ابنى أنا ما اعتقوش
كلام عن سماسره كلام عن دعاره
حاجات مش صحيحه جمل مستعاره
وعايزين يخلوا البلد اردغانه
وعايزنى اسيب البلد من زمان
وأنا مش ح اسلم واسيب الأمان

ولا بالبوليس والنيابه كمان
فيا ايها الشعب كمل جميلك
وصبرا واذلم حتيجى المصارى
وتاكل وتشرب تبع ما يأتيلك
وتغرق فى بحر العبيد والجوارى
وترسم حياتك حسب ما يرائيلك
ونملا الحوارى فساقى وقصارى
تسيح بحمدك وتشكر جميلك
وفضل الزباله وطفح المجارى
ختاما سلاما وآخر كلاما
ضرورا

يسود الهدوء والوثام فماذا والا
ح طريقها واللا اهرب فلوسى
واسافر قواما سلام عليكم
وسلمون وموز بصفتى رئيسا
وابا وجوز

القاهرة 1967/

[اعلى الصفحة](#)

دور يا كلام على كيفك دور

دور يا كلام على كيفك دور
خلي بلدنا تعوم فى النور
وارمي الكلمة فى بطن الضلمة
تحبل سلمة وتولد نور
يكشف عينا ويعيينا

نسعى نهب نثور
دور يا كلام على كيفك دور
عم امام عنده كلام
وسواح في بلاد الناس
من شوق نوله يغزل قوله
ويغني مرفوع الراس مرفوع الراس

[اعلى الصفحة](#)

نشيد الكروان (إلى الشعب)

دار الفلك .. في مغزلك
طول السنين ما أمهلك
يا ماسك الروح في الحياة
الحب لك و الخلد لك
أنت الازل و انت الابد
و الهالك اللي يجهلك
يا شعب يا روح الخلود
الملك لك و الخلد لك

..

الليل حلك .. و اليوم سلك
و البحر عطشان منهلك
و السهم طاش
اسقس العطاش
انت الكريم و بنسألك

....

يهودا خان .. أكم يهوذا و باع مسيح
لا يهوذا دام و لا جرح بلاد جريح
مليون يهوذا خان أمانك و إنهلك
و انت اللي باقي
عالسواقي
و منجلك
يفرش حصير القمح .. فوق دم المسيح
و انت الجريح
تيجي الاطبة و تسألك
ما أعجبك
ما أنجيك
ما أحملك
ما أنبلك
يا شعب يا نبض الوجود
الخد لك
و الملك لك
الحكم لك .. الحكم لك

اعلى الصفحة

قرات في العدد الأخير من مجلة القمة، مقابلة فعلاً ممتعة مع الشاعر الكبير احمد فؤاد نجم، ارتأيت ان انشره هنا.

في حديث عن السياسة والذكريات

أحمد فؤاد نجم : الوحدة العربية مازالت أنبل أحلامنا

الحوار مع الشاعر الكبير أحمد فؤاد نجم - أو عم أحمد كما يحب ان يطلق عليه ، حوار ممتد وممتع وموصول، ينتقل من السياسة الى الشعر الى الصحافة الى الذكريات الجميلة، ف عفوية عم أحمد، حلوة ومتدفقة وتحمل أيضا روح التمرد والتعبير الحر.

أحمد فؤاد نجم شاعر أصيل وسياسي مشاكس ومعارض حقيقي رغم انه لم ينخرط في حزب أيديولوجي وإنما كان على الدوام يشكل وحده حزبا يضم في عضويته الآف المقهورين والحالمين . بعد هذه السنوات الطويلة ترى ماذا تكون إجابته حول الأحلام التي داعبت مخيلة الملايين من العرب والمصريين لعقود طويلة، وماذا عن مشاعر الناس الحقيقية التي لمسها العم احمد في زيارته المتعددة

للبلدان العربية؟

بيروت حبيبتي

- في مايو 1967 - قبيل النكسة - سافرت الى بيروت مع وفد منظمة تضامن الشعوب الأفرو آسيوية التي كان يرأسها وقتها يوسف السباعي، ومن الطائرة نزلت الى المستشفى لإصابتي بالمalaria أو شيء من هذا القبيل، فتخلفت عن اجتماعات المؤتمر الذي جئنا لأجله، وكانت فرصة للاحتكاك باللبنانيين، كلما كنت أتكلم بالعامية المصرية أجد من يقول لي: يا هلا بزلام أبو خالد يعني أهلاً برجالة عبد الناصر! هذه الجملة كان يقولها الناس البسطاء العاديون.

وهناك كدت ان أتزوج، ولم تنفع الجوازة بسبب تدخل -الله يرحمه- الأستاذ يوسف السباعي، فقد ذهب أهل العروس التي أردت الزواج منها كالمعتاد يسألونه عني فقال لهم كلاماً غريباً عني، وفشل زواجي من الحبيبة البيروتية، عموماً الله يسامحه.

وفي تلك الفترة القصيرة التي قضيتها في بيروت تعرفت الى كثير من الفلسطينيين واللبنانيين ودارت بينهم وبينني مناقشات لذيدة ومعقفة أعادتني وأنا مؤمن وموقن بأن الوحدة العربية مصير وقدر لا بد منه ولا مهرب منه.

بعدها حدث ما حدث وجاء يونيو 1967 بالهزيمة ثم خرجت من مصر وسافرت الى الجزائر والمغرب وسوريا ولبنان واليمن وليبيا في سنوات 1982 - 1984 عندها اختلقت المسألة، واحتككت أيضاً بالأشقاء في الخليج سواء في مصر أو في الخارج، ولم أزر من دول الخليج سوى قطر، ولاحظت اختلافاً كبيراً عندهم وبعدها عن الحديث عن الوحدة وكذلك في المغرب والجزائر.

&61623#؛ وماذا عن ذكرياتك في سوريا وليبيا في هذا السياق؟

- في سوريا وليبيا المسألة تختلف تماماً، في منتصف الثمانينات كنت أجد سائق التاكسي في دمشق يشغل شريط كاسيت لأم كلثوم أو عبد الحليم حافظ أو خطب عبد الناصر، ليس لأن الراكب معه قادم من مصر، فهو لا يعرف على وجه الدقة من الراكب، وكذلك لو دخلت بيت شخص بعثي تجد صورة حافظ الأسد وصورة عبد الناصر، ولو دخلت بيت شيوعي تجد صورة لينين وماركس ومعهما صورة عبد الناصر.

أتذكر عندما كنت في الشام كان يعقد مهرجان للمسرح العربي، ومصر أرسلت فرقتين، إحداهما تعرض مسرحية الوزير العاشق وكان بطلها المرحوم الفنان عبد الله غيث، وفي أثناء المهرجان كنت أحضر أمسية شعرية في كلية آداب جامعة دمشق، فعزمت أصدقائي من ممثلي المسرحية على الحضور فحضر معظمهم ماعدا الممثلين الكبار، وأثناء وقوفي على المسرح ألقى قصاندي، فوجنت بما يشبه الانفجار في القاعة، تصفيق وصراخ هستيري، نظرت فوجدت عبد الله غيث ومعه عزة بليغ، فتوقفت عن الإلقاء، واستمر التصفيق خمس دقائق متواصلة، وعبد الله غيث يقف في حالة ارتباك، فنزلت وأخذته من يده الى المسرح لكي يحيي الناس ونزل، ثم طلب الجمهور سماع قصائد معينة، وكثرت الطلبات وتضاربت، فقلت لهم: والله العظيم، إذا لم تنتظموها لاطلعلكم عبد الله غيث يتكلم فتصاعد الصراخ، نزلت وطلع غيث مرة أخرى وقال الاتي: أنا رجل شغلتي المسرح، وشغلتي الكلام، وعمري ما ارتبكت، أنا لأول مرة في حياتي أرتبكت أمام الجمهور، وأنا جايب لكم سلام من القاهرة لشقيقتها دمشق عاصمة الجمهورية العربية المتحدة.

ولا تسألني عما حدث بعد ان نطق عبد الله غيث بهذه العبارة، حالة هيستريا وحماس وجنون، وبدأت دموعي تتساقط، تأثراً من هذا المشهد. مثل هذه الحالة تجدها في نفوس الناس البسطاء الفقراء، في ليبيا وأكثر، ففي سوريا قد يختلف الناس معك في انتقادك لعبد الناصر ولكن في ليبيا سوف يقتلوك !

أما في المغرب العربي فلم يعد به حالة القومية العربية، بل حالة أبعد تماماً، وجدت هناك شباباً كثيراً وخاصة في مجال الإعلام كل مصدر فخارهم ليس عروبتهم أو تاريخهم وإنما فريق كرة القدم!! رأيت ذلك حتى عند ناس مثقفين! فيما عدا بالطبع قلة من المثقفين موجودين في كل بلد عربي، يفكرون مثلنا.

&61623#؛ لماذا خصصت شباب الإعلاميين في المغرب، هل لذلك قصة؟

- نعم هناك قصة، وأنا في المغرب دعاني الطبيب الصديقي الذي يعتبر عميد المسرح المغربي، دعاني هذا الرجل لحوار في برنامج للتلفزيون المغربي وقال لي: هناك 3 محظورات لا تقترب منها، وهي مفهومة للجميع في المغرب، قلت له طيب، وقتها كانت زيارة بيريذ للمغرب، فقلت له نتكلم عن الزيارة فرفض، فقلت له: هل تريد ان اذهب للتلفزيون وأقول لك ازيك فتقول لي: الله يسلمك ونأخذ بعضنا بالأحضان!! ولم اذهب لتسجيل البرنامج.

من المعروف ان لك علاقة جيدة بالقائد الليبي العقيد معمر القذافي، وأنتك نزلت في ضيافته شخصياً، فما انطباعاتك عنه؟

- رحلتي التي ذكرتها توا للمغرب وقت زيارة بيريذ لها حكاية تبدأ في ليبيا التي كنت أزورها بدعوة من العقيد القذافي الذي تربطني به صداقة وكنا نلتقي يوماً أثناء وجودي في ليبيا، وذات يوم وأنا في الفندق أيقظني شخص أعرفه بالتليفون وقال لي بشماتة شديدة بيريذ في المغرب فقلت له، ما الغريب في الأمر؟ فقال ذلك الشخص المشاكس يا ترى ماذا سيفعل صاحبك؟ ويقصد (القذافي) بسبب عضوية ليبيا في الاتحاد المغاربي الذي لم تكن تواقع القادة العرب ومنهم القذافي بالطبع قد جفت على أوراق إعلانته.

ولم تمر دقائق حتى اتصل بي القذافي نفسه وقال: شفت ماذا فعل ملك المغرب! فسألته ماذا ستفعل؟ قال: لا أعرف فقلت له إياك ان تقوم برد فعل انفعالي، تصرف بهدوء. وفعلاً ظهر القذافي على شاشة التلفزيون وقال ان ما حدث خروج على (اتفاق الاتحاد المغاربي) وأنه متأكد من ان الشقيق الأكبر الملك الحسن الثاني سيدارك المسألة وسيعالجها.

بعدها ذهبت الى القذافي وقلت له أنني سأسافر الى المغرب لأعرف المسألة عن قرب، وفي المغرب قرأت في صحيفة الاتحاد الاشتراكي تنويها عن حفلة تابين في المسرح الوطني للمخرج حوري الحسن الذي انتحر احتجاجاً على زيارة بيريذ للمغرب!

وأقصد من ذلك القول ان المشاعر الشعبية محاصرة، سواء في رفض التطبيع مع العدو أو في فكرة الوحدة العربية، والتفكير بصوت عال في الوحدة والقومية العربية غير مسموح به، ولكني متأكد ان الوحدة موجودة في قلب المواطن العربي العادي الغلبان المطحون، أما المثقفون فكثير منهم تفرقوا شيعاً ولعبت اغراءات السلطة بعقولهم، بعد ان أذاهم القمع والقهر نفسياً.

وسأنتقل الى مكان آخر، الى اليمن حيث ذهبت الى عدن اثر المذبحة التي انتهت بهروب علي ناصر محمد منها واستيلاء القيادة الجماعية على السلطة، جماعة علي سالم البيض وأبو بكر العطاس، هناك لم يكن موضوع الوحدة الموضوع الأبرز في الساحة، بل ان لملمة الجراح كانت الأساس بعد مذبحة راح ضحيتها 15 ألف شاب يماني، فهناك تاريخ غير مقروء في كثير من بلادنا العربية لا تستطيع ان تعرفه وأنت جالس بعيداً تنظر مع أفكارك.

باختصار أستطيع القول ان السوريين هم أكثر الشعوب العربية من حيث يقظة وجدانهم وسخونته في مسألة الوحدة، وقد عشنا فترة طويلة من الزمن شهدنا فيها قادة عربا يستخدمون شعار الوحدة لتضخيم أنظمتهم والإيحاء بأنهم الأمل الوحيد في الوحدة العربية وجاء ذلك خصماً من حساب الفكرة، التي لم تعد للأسف حية ويقظة مثلما كانت أيام عبد الناصر، ربما لان الناس فقدت الثقة فيمن يطرحون الفكرة في الزمن الحالي، وربما لان الانشغال بالأحوال الخاصة أصبح مسيطراً على كثيرين، وأصبحت إثارة موضوع الوحدة تتم على استحياء!

&61623#; احتكاك الشعوب ببعضها البعض كان له تأثير على فكرة الوحدة العربية، سواء بالسلب أو بالإيجاب ما تعليقك؟

- هناك شيء لا يلتفت إليه كثيرون، وهو ان كل المناطق العشوائية التي بنيت حول القاهرة، بنيت بفلوس النفط، فيقال مثلاً ان عشوائيات شبرا الخيمة أقيمت من فلوس العراق، أي من خلال عمل كثير من سكانها في العراق، ولذلك يتعاطفون معه، وتجدهم حزاني لضرب العراق، الاحتكاك والاختلاط والعشرة بين الاشقاء العرب مسائل ضرورية.

● وجهت كلاماً حاداً ونظمت أشعاراً ساخرة، ضد السادات واتفاقيات كامب ديفيد، ترى ماذا فعلت السياسة والسياسيون العرب لتجسيد فكرة الوحدة العربية والتضامن في مواجهة التحديات التي تواجه الأمة؟

- كل واحد استغل الموقف لصالحه، أتذكر وأنا عند العماد مصطفى طلاس، وزير الدفاع السوري في دعوة على العشاء، ودعا على شرفي مجموعة من المثقفين، بينهم دريد لحام وبعد قليل بدأ دريد لحام يعمل عرض التريفة على السادات قلت له، إياك ان تسخر أو تشتم السادات، وتكهرب الجو، وجاءني طلاس يسألني، ما الحكاية يا أخي السادات خاين! قلت له: وإحنا قتلناه، خلاصة هذه الواقعة ان كل حاكم وظف المسألة لصالحه، ولم ينظر أحد لصالح القضية العربية، لم يهاجم أحد السادات لصالح القضية العربية، أو لان السادات خان القضية الفلسطينية، والسادات من وجهة نظري ليس أول الخونة ولكنه أشدهم حمفاً فقط، لانه أعلن ذلك وألبس الحدوتة لباساً وطنياً، بقوله ان سبب بحثه عن السلام هو الأزمة الاقتصادية طيب هل حل السلام الأزمة الاقتصادية؟! أم إنها زادت؟! الحقيقة ان الكذابين كثيرون.

&61623#; هل من الممكن الكلام مرة أخرى عن الوحدة العربية حالياً؟

- ليس عندي تصور جديد، وإنما أكيد ان هذه الوحدة هدف نبيل، ولكني اعتقد ان تحرير فلسطين هدف أقرب، تخيل معي تحرير فلسطين وسقوط الدولة العنصرية الموجودة فيها ماذا يمكن ان يحدث في المنطقة؟ اعتقد ان تحقيق الوحدة يظل أمراً صعباً مادام هذا الكيان مزروع في جسد الأمة، وطالما ان بعض الأنظمة العربية لا تفهم مصالح شعوبها، تصور هذه امريكا تقول جهاراً نهاراً ويسمعها الأطفال في المدارس أنها تضمن أمن اسرائيل وتضمن تفوقها العسكري المطلق على جميع الدول العربية، ومع ذلك نطلع نحن على الناس ونقول: امريكا هي الوسيط وراعي السلام أي سلام يقصدون!

&61623#; يعني ان الوحدة تظل حلمًا؟

- تظل حلمًا بل أجمل الأحلام، تخيل ان تكون لك حرية حركة وتنقل من المحيط الى الخليج، تخيل الهنا الذي نعيشه وقتها، ذات مرة قال لي القذافي: حاول تتخيل مصر وليبيا والجزائر وتونس والمغرب دولة واحدة، تخيل شكلها ماذا سيكون!.

• لو افترضنا ان سبب انهيار فكرة الوحدة - ضمن أسباب كثيرة - هو غياب قوة مركزية ممثلة في مصر ككل أو شخص عبد الناصر، لو إننا نريد إعادة أحياء الفكرة للحياة مرة أخرى أليس ضرورياً ان تعود مصر قوية من جديد؟

- لا يبدأ المشروع مرة أخرى إلا من مصر، ليست الوحدة فقط وإنما التغيير الاجتماعي في الوطن العربي كله، الثورة الثقافية لازم تبدأ من مصر، وهذا قدرنا وليس مجرد ادعاء سببه حب مصر، وإنما هو قدر ومسؤولية ويبدو ان عمنا جميعاً جمال حمدان كان عنده حق في مسألة عبقرية المكان، لا نعرف بالضبط ما هو سر مصر! لا نعرف لماذا كانت القاهرة في كل الحالات التي مرت بها سواء الصعود أو السقوط، هي الحاضنة الرعوم للثقافة العربية! ستقول لي مثلاً لان بها الأزهر وتعلق المسلمين به، أقول لك طيب وماذا عن الثقافة الحديثة التي ليس لها علاقة بالأزهر وربما متخاصمة معه؟ لماذا ولد اكبر حزب شيوعي عربي (وهو الحزب الشيوعي السوداني) في مصر؟

• ولكن هل تنفع الوحدة العربية في ظل وجود فجوات اجتماعية وثقافية بين بعض البلدان؟

- هذا كان نقطة الخلاف بين عبد الناصر والشيوعيين، كانوا يريدون عدم التعجل ودم الفجوات أولاً، أما عبد الناصر فكان يريد خبطة نفسية في مواجهة الحرب النفسية المعلنة ضده، فتسرع وتعامل مع الشيوعيين باعتبارهم أعداءه، رغم انهم كانوا حليفه الأول، أتذكر كلمة للمرحوم فيليب جلاب (الذي رأس تحرير صحيفة الأهالي اليسارية المصرية فترة من الوقت) كنا تحت التعذيب والضرب بالشوم والكرابيج وساعة ان نعلم بسفر عبد الناصر كانت قلوبنا تعزف لحن حبه، تحرسه لكي يعود بالسلامة،

#61623#; من من البلاد العربية التي زرتها أعجبتك إبداعات المرأة؟

- في سوريا ولبنان ميدعات كثيرات والمرأة هناك مثلها في مصر ليست ممتهنة، المرأة في المغرب لديها ثقافة واطلاع، هناك وجدت البرافدا والتايم وكتبي وكتب الشيخ الشعراوي كلها جنباً الى جنب، وهذه معركة القذافي في ليبيا، حيث المجتمع قبلي، يقاتل دفاعاً عن حرية المرأة وأنا اشهد له بذلك، وقد نجح الى حد بعيد في تحرير المرأة، كانت لديه وزيرة ثقافة فوزية شلابي، وحرصه سيدات، وأذكر انه أقام مدرسة ثانوية عسكرية للبنات، فذهب إليه شيوخ القبائل واعترضوا وقالوا له ان ذلك لن يحصل، وإذا قلت هذا الكلام مرة أخرى سذبحك. فخرج الى التلفزيون واعلن انه لا يستطيع ان يحضر البنات من بيوتهن، إنما يستطيع ان يحمي أي بنت تأتي الى المدرسة، وكان العدد المطلوب للمدرسة 500 طالبة، فجاءت 3 آلاف فتاة، وهذه معركة حقيقية يقودها القذافي ببسالة شديدة، ولكن إعلامه لا يلتفت الى ذلك، وربما ان شعبه كله في واد والقذافي في واد آخر.

#61623#; لم تحدثنا عن السودانيين، هل لأنك لم تزر السودان؟

- لم أزر السودان حقيقة، ولكني عاشرت السودانيين، وهم شيء راق جداً، شعب طيب ومتحضر، يتنفس الديمقراطية، يحبون مصر موت، أنجب أفذاذاً، عبد الخالق محجوب والشفيق أحمد الشيخ والطيب صالح، السودان شعب صادق لا يكذب يحب مصر جداً وما يبهرني في السودانيين، الديمقراطية لأنني رأيت كيف يراقص سائق في السفارة السودانية، زوجة السفير، وزوجة السائق تراقص ابن السفير، كل السودانيين ليس بينهم فروق مصطنعة.

#61623#; لماذا يتحسس بعض السياسيين والمتقنين المصريين من الانتقادات العربية لمصر، وتفسرونها وكأنها ضد فكرة الوحدة او ضد فكرة الريادة بشكل عام؟

- بالتأكيد، ضد فكرة الوحدة، وضد ريادة مصر، التي أصبحت عقدة عند البعض ان تسود الفنون المصرية، ان يتطور الإنسان المصري وتتسع الثقافة المصرية، مسائل تقلق هذا البعض، حسداً لمصر ودورها الريادي باعتبارها مصدر الإشعاع وبوتقة التحضر والتطور.

أتذكر عندما ذهبت الى قطر منذ فترة طويلة، وجدت بعض الصحفيين الذين كانوا يدعون الناصرية قد تحولوا الى أصحاب ملايين وحاصروني هناك، يرسلون ناسا يشتمونني ويحرجونني وفي ندوة من الندوات طلع صحفي قطري وقال: عرفنا رأيك في عبد الناصر والسادات، طيب قل لنا رأيك في حسني مبارك؟ وكان يقصد إحراجي، قلت له: تعال إلي في القاهرة وأنا أقول لك رأيي في حسني مبارك بصوت عال، ولكن قل لي أنت ما رأيك في رئيس بلدك، فهرب وضحك الحاضرون عليه وصفقوا لي.

[اعلى الصفحة](#)

استغمايه

غمي عيونك
سد ودانك
إفتح بقلك
قول انا فين

الشاطر فيكو
يحزر فزر
في دقيقتين
والإشطر منه
اللي يحزرها
في غمضة عين
والإشطر خالص ما يحزرش
يقول انا فين
والإشطر أشطر
اللي يبص يشوف بالعين
انا فين ؟
فيه ناس

اختلف في الموضوع
وحكاوي اتقالت
عن مواضيع
والناس لا مواخذه
في زمن الجوع
يتعشوا كلام
يفطروا تشنيع !

فيه واحد شافني
بلبده ولاسه
في باب اللوق
والثاني
لمحني بقفصين موز
علي باب السوق
والثالث شافني
في كاديلاك
راكب مع بنتين
والرابع
شافني ف طنطا
بابيع
بلابيع ونشوق !
وصحافه الصاوي
والوردادي
والجمال
وأباطه ولاظه

وباقى الدلائل
والأندال
بتأكد جدا
جدا جدا بالتدقيق
إن انا محبوس
وباروح يوميا
للتحقيق!

طب اصدق مين
وأكدب مين؟!
ماهي حاجه تمخول أيها عاقل
وانا مجنون
وباكلم نفسي
وعقلي صراحه
ماهوش مضمون
لو كنت بلبده ولاسه
وماشي ف باب اللوق
طب إيه مشاني
مفلس جدا
جنب السوق?!
لوكنت بدأت
كتاجر فاكهه
وبقفصين?
مش كنت زماني
معلم طمبه
وجوز اتنين؟

لوكنت ف كاديلاك
زي ما قال
التالت بيه
ومعايا بنات
زي الشربات
طب ح انزل ليه?!
لوكنت يا طنطا
بابيع بلابيع
وسطل وبخور
مش كنت زماني
مدير على جامع
أو مأمور؟

وصحيح الصاوي
والورد اوي
والجمال
حابسين أفكار الناس

في بلدنا
وعال العال
إياك قاصدين
إن انا مسجون
زي الملايين؟
كده يبقي تمام
ولأول مره
ح اقول " صادقين "
بس انا لا مؤاخذه
وبالتدقيق
ماحصلشي معايا
ولا تحقيق!
مش حاجه تحير
طب أنا فين؟
حزرتوا خلاص
فزرتوا خلاص؟
عارفين
أنا فين
أنا ساكن قلبي و متونس
بالناس
والناس الونسه كتير
ماليين القلب
وشاغلينه
سارحين في الدم
وفي التفكير
وجناين قلبي العمرانه
بالناس
الأزهار
العصافير
سايعاني
وسايعه اللي باحبه
وتساعي معايا
رفاقه كتير
شايقين انا فين؟
الشاطر فيكو
يحزر فزر
في دقيقتين
والأشطر طبعا
يحزرها
في غمضة عين
أنا فين؟

الإضراب

باسم الإله الشعب
رب المضربين
الصايم
المحروم على مر السنين
يا منشدن الحي
حيوا حينا
واحنا هنا
ع العهد دايمًا مخلصين
محلا القصايد
في الشدايد .. والغنا
محلا الكلام الحب
أوقات الشقا
احنا اللي تهنا ع الطريق
من بغضنا
متفرقين
والسجن هوا الملتقي !
آه يا رفاقه
من متاهات الطريق
لما الليالي
بيتخنق فيها القمر
يمشي الصديق
في الضلمه
يخبط في الصديق
والسكه بنت الخطوتين
تاخذ سنه !

إحنا النهارده فين
وكام
وبكره كام
وبعده فين ؟
في كل يوم بنزور مكان
وكل يوم
بنزيد عدد
وكل يوم
نفتح ببيان
وكل يوم
بنزيل سدده
وكل يوم
يطلع بنا

وكل يوم
ينزل هدد
وكل يوم
نحبل غنا
وكل يوم
نولد مدد
احنا كده لازم نكون
جوا السجون
برا السجون
محلا القصايد
في الشدايد والغنا
محلا العيدان الخضر
في الربيع الخراب
احنا اللي تهنا ع الطريق
من بعضنا
متجمعين
بنخط صفحه في الكتاب
ملعونه قامه تنحني بالقهر
من حاكم .. وخان
ملعونه كلمه تنتني في الحلق
تهرب م اللسان
ملعونه ساعه تنحسب م العمر
يطويها الخنوع
ملعونه لقمه مغمسه بالذل
ملعونه الجبان
آه يا رفاقه
ياللي عملتوا الصلابه للحجر
بانده لكم
وسط الكآبه
والرتابه .. والضجر

يا مقربين الفجر
نوره ومطلعه
مدوا المسامع
في المجامع
واسمعوا
صرخة مغني الحي من جوف العدم
اتجمعوا
اتجمعوا
اتجمعوا

[اعلى الصفحة](#)

مقدمة أبو العلا 90

الكورس _

سافر غريب الدار
مشوار ورا مشوار
بلد الحبايب .. فين ؟
تاه السؤال واحترار

المغني _

ومشيت كتير ورأيت
ناس ع الطريق ضايعين
ورجعت تاني لقيت
ناس ع الطريق راجعين
وعملت قلبي سبيل
يهدي الحيارى
دليل

وعشقت

عشق النيل

للخضرة والنوار

الكورس _

سافر غريب الدار
مشوار ورا مشوار
بلد الحبايب .. فين ؟
تاه السؤال واحترار

المغني _

يا سكه الأحلام
يا مغربه روجي
اشكيكي للأيام
ولا أشتكي روجي
علمتي قلبي يميل
للحب

والمواويل

وحلمت حلم جميل

بالجنه

ونا في النار

[اعلى الصفحة](#)

بابلو نيرودا

شيلي البارود

حطي الوعود

والتعليقات

في المهملات

سفحوا الورود
من ع الخدود
والخضره
من قلب البنات

فين الأمان
جنب الغيلان
يا ملفقين
عصر التبات ؟

لا الجرح بات
ولا إتسي
ولا التاريخ
والذكريات
سيدنا الحسين
اسبارتاكوس
الليندي
لوركا

عب رحيم
فلاح بلدنا اللي انشوى
قبل القيامة
في جحيم
سينا الطعينه المزمناه
ارنستو
جيفارا العظيم
خميس وبقري
والشفيع
أدهم

ومواله القديم
قطب الرجال اللي ابتلي
لما تلا الذكر الحكيم
عقد العقيق اللي اتبدر
من عهد سقراط الحكيم
زاد النهارده
وانتظم

بالدره والفص اليتيم
نيرودا
زمار الصباح
نيرودا
مزمار النسيم

صباحه الصبيه
" سانتياجو "
تشرب لبنها من غناك

اترعووا العصافير
وهاجوا
لما نعتت البوم
نعاك
وانت الشهيد
ملو البراح
جراح تعود المجروحين
ساعتين تشاور
ع الجراح
ينشد ضهر المطعونين
تتمدد ايدهم ع السلاح
وبعزم ما في الموجوعين
تطعن في شريان الطاعون
تجهز
على الداء الدفين
الشمس تطلع بالصبح
ترمي الصبح
على كل الإبد
حاضنه البنادق والجراح
بايد وعافقه الناي
بايد
والشمس تطلع في النهار
فوق كل قصر
وكل بيد
والشمس تسقط
في الغروب
عن بابلوا نيرودا .. الشهيد

دواره بتعدي السنين
يا أرضنا
يا ام البنين
دواره بتعدي اللي فات
يا أرضنا يا ام البنات
كروب
حروب
محن شعوب
كلاب
عذاب
ضباب
غروب
بروق
رعود
شروق
صعود

نضال
سجال حرام
حلال
والعدل .. كان
في كل آن
هو القضية
والرهان
والارض عاشت من زمان مسرح لفرسان الميدان
سيدنا الحسين
اسبارتاكوس
جيفارا
لوركا
عب رحيم
نيرودا زمار الصباح
نيرودا
مزمار النسيم

[اعلى الصفحة](#)

عطشان .. يا صبايا

عطشان يا صبايا
وانا عاشق .. ع السبيل
عطشان
والميه ف بلدي
على عكس ما يجري النيل
والنخل العالي مطاطي
والجذع الواطي
ذليل
والريح العاكس
كابس
والريح العاطي
بخيل
والنسمه اتعكر لونها
من هم الناس
يا خليل
عطشان والنيل في بلدي
والزرع اخضر
وجميل
وانا كنت امبارح خالي
واليوم دا
صبحت عليل
عطشان ودوايا حبيبي

يسقيني العشق دليل
ودليل الحب .. عمائل
وكلام الحب جميل

وانا كل ما أقول التوبه
تغويني .. المواويل
تطرح في القلب جناين
تفقس فيها الزغاليل
عشاق يا حمام الغيه
ولا فيش قدامنا بديل
سكه ومحسوبه علينا
نمشيها

جيل ورا جيل
ع الشوك
نفرد خطاويننا
في الليل
تضوي القناديل
حوالينا قلوب حبابه
ومعانا العقل دليل
والشمس تصب صبابه
والمنبع
نهر النيل
وان لاموا علينا
يلوموا
ما لهمش علينا سبيل
ما هو شوك العشق
ملامه
والشوك
في الورد أصيل
ودوني ع السبيل
ودوني ع السبيل

[اعلى الصفحة](#)

الشاعر الأكره

أنا الأديب لما أتكلم ما باخليشي
لأني جاهل
وفاجومي
ومخ مفيشي
وأي تغيير في حياتي
ميتعبيشي
وأنا اللي قولي على نويي
مش من بره

وأبدأ كلامي عن الأشعار
واللي زانوها
بيرم وخيري
وكل الناس اللي صانوها
أما الكلاب عند الجواسيس
واللي خانوها
فدول كلاب
وما مبنذكروش هنا بالمره
الله الله يابدوي
هنا بالمره

يا عم بيرم وحياتك
واللي أماتك
وخلا الناس مآبين
عايشيين على مقالاتك
وواد مباحث يتطاول
على مقاماتك
لاجعل الشعرا الأندال
مسخه وعيره
الله الله يابدوي
هنا بالمره

في كل مولد ياشويعر
لقلفت حزام
ورقصت تبع المزينة
وكنست مقام
وصاحبت كل الألاتية
ومشيت خدام
لكل عالمة وشبشبا
حسب الأجرة

حرباية يابن الحرامية
مية المية
على كل لون جاهز تركب
ع التسقية
أما انت مالح ومزبط
وابن غبية
وحصانك اللي راهنت عليه
يخسر بكره
الله الله يابدوي
يخسر بكره

الطيب غير الشعر يا واد
ماتهبشني

وأى شخص يكون شاعر
مايطلبشي
ياتقول كلامك جواك
يا متقبلشي
ملعون ابوك طالع نازل
شاعر أكره

1975م

اعلى الصفحة

فات الهوى

فات الهوى سلم علي
بات السهر ساكن عنيه
عاد الهوى بين يوم وليله
وإحنا سوا يا نور عنيه
فات الهوى
آه يا أسمراني
لحظه ما فات لحظك
ناداني
عاد الهوى قام التقاني
زى الهوى
قلبي ف إيديا
فات الهوى
يا واد يا خمري
سلم
وأنا سلمت أمري
عاد الهوى بالشوق يا عمري
يملا السهر والنوم عليّ
فات الهوى
آه يابن عمي
زى الهوا شعلل فى دمي
وأما شكيت الوجد لامي
ضحكت
وباستني ف عنيه

اعلى الصفحة

هو شي منه

يادي العجب يا رجب
يا مرتب الحكايات
إسمع وشوف وإندهش

وأكتبها في الكتب
عسى الكلام ينقري
لو قلبوا الصفحات
خلي الشعوب والدول
تتعلم البطولات
الحزن طول عمرنا
له من حياتنا حياه
نقضيها في النههه
ونضيع الأوقات
نكي على اللي مضى
ونعيش مع اللي فات

اعلى الصفحة

سايجون

أجد هوز
حطي كلمن
إفتح صفحه
إمسك قلمن
إكتب زي
الناس ما بتنطق
سقطت سايجون
رفعوا العلمن

طلعت شمس اليوم دا
أغاني
كل ما نسمع
نعشق تاني
طلعت شمس اليوم دا
حريقه
تشفي الجرح
وتبري الألمن

سايجون عادت للثوار
فوق الدم
وتحت النار
جدوا فوجدوا
زرعوا
فحصدوا
وإحنا إدينا للسمسار
وإللي قالوه السمسار جيه
وإللي حكاه السمسار دار
لما قروه القروانجيه

بالمستعدل والمندار
هتتش و نتش
بعزم الصوت
عن أمريكا وهوا أمريكا
زعموا الفانتوم
شاييل موت
سقط الموت بعلم أمريكا
جاتكو فضيحه
يا طبقه سطحيه
وعامله فصيحه
وجاييه العار
قراونجيه
وكتبنجيه
وسمسارجيه
وسمساردار

سايجون دره يا ثوار
عادت حره
للأحرار
داحنا حنشبع بكره أغاني
إسمع وحفظ يا كتباني
واثبت عندك فى الأوراق
مصر بتنضح بالأشواق
مصر عروسه
وبكره عريس
والعشاق إحنا العشاق
فينا وبيننا ولينا الثوره
إحنا الثوره
وهي الناس
فينا الماضي
وبينا الحاضر
والمستقبل
هو الناس

اعلى الصفحة

عنيكي

وعنيكي سكة سفر
في الصحرا .. والواحه
والشوق .. ودنيا السهر
لانوم .. ولا راحه
ولا الرموش السود
بينادوا ع الموعود

وانا اللي خدني الغزل
ع الجنه طوالي
وشربت نهر العسل
وغزلت موالي
وسهرت فيكي الليل
والناس تقول يا ليل

ورجعت سكة سفر
في الصحرا .. والواحه
في عنكي

وانا باقول يا ليل
ولكل عاشق ليل
يا جنه الملتقي
مين فات سأل عنا
ومين عطف بعدنا
ع الورد .. يا جنه
من لحظه كنا سوا
والعشق كا تباريح
ورجعت سكة سفر
في الصحرا .. والواحه
في عنكي

[اعلى الصفحة](#)

أبو العلا 90 الخاتمة

سيبه سيبه سيبه
خليه ياخذ نصيبه
دا واحد عصر حجري
وشايل قلب غجري
لو هو قطر مجري
بكره الجنان يصيبه

ويخرج عن قضيبه
وراك وراك ياشاطر
يا ملخبط المسائل
يا مقدم الأواخر
ومأخر الأوائل

إسمك ؟ ما اعرفش اسمك
ولا حتي شفت رسمك
ولا تخليت كسمك
بعيده من قريبه

لكن لآزح آجيبه
وراك وراك يا غاوي
تتسلى بالمواجع
وتشرب القهاوي
بمناسبة الفواجع

شرك شعلل شرارك
وحررق جارك ودارك
وان كان على قرارك
لو حتى فين ح آجيبه
ومش ممكن ح اسيبه

[اعلى الصفحة](#)

مّر الكلام
مّر الكلام
زي الحسام
يقطع مكان ما يمر
اما المديح سهل ومريح
يخدع صحيح ويغر
والكلمة دين
من غير إيدين
بس الوفا
ع الحر

[اعلى الصفحة](#)

النيل عطشان
النيل عطشان يا صبايا
للحب والحنين
والشط
لأنور
ولا نسمة
ولا ناي
ولا عود يا سمين

يا شاهنده وخبرينا
يا ام الصوت الحزين
يا ام العيون جناين
يرمح فيها الهجين
ايش لون سجن القناطر
ايش لون السجانين

ايش لون الصحبه معاكي
توار البساتين
كلك محابيس يا بلدنا
وهدومك
زنازين
وغيطانك الوسايح
ضاقت ع الفلاحين
والدخان في المداخن
لون هم الشغالين

يا بنات النيل يا سبايا
ف حبال الجلادين
ما بقاش في زمانكم عنتر
لكن فيه الملايين
فارس محسوب الخطوه
يتحرك بالقوانين
لحظة ما تحين الساعة
يركب ظهر التنين
ويحطم الحواجز
ويفك المساجين

سجن الاستئناف 1980

[اعلى الصفحة](#)

ديستان

فاليري جيسكار ديستان
والست بتاعة كمان
حجيب الديب من ديله
ويشبع كل جعان
يا سلامم يا جدعان
ع الناس الجنتلمان
داحنا حنتمنجة واصل
وحتبقى العيشة جنان
التليفزيون حيلون
والجمعيات تتكون
والعربيات حتمون
بدل البنزين
بارفان
وحتحصل نهضة عظيمة
وحيبقى علينا القيمة
في المسرح او في السима
او ف جنينة الحيوان

وحتبقي الاشيا زلابية
ولا حوجة لسوريا وليبيا
وحنعمل وحده ارايبا
مع لندن والفاتيكان
والفقرا حياكلوا بطاطا
وحيمشوا بكل الاطة
وبدال ما يسموا شلاطة
حيسموا عيالهم
جان
واد بفضل صديكي
ديستان الروماتيكي
ولا حدش فيكو شريكي
في المسكن
والدكان

[اعلى الصفحة](#)

تاجر

تاجر نزل سوق
شاف غزاله
مع الدلال
قرب يدوق العسل
نهر الدموع شلال
شرب عديم التنا
من دمعنا المسفوح
زاد في السعار والغنا
من خسه الدلال
اخص
اخص
اخص .. على كده

[اعلى الصفحة](#)

حرب الشعب

ماتقولليش
ماتعدليش
حرب الشعب وغيرها مافيش
حاس يامصاروه
حاس ياولاد
حاس يامداين
حاس يابلاد

حسنا ياناسنا وداسنا الغول
عض بلدنا
عرض وطول
ماتقوليش الجيش مسؤل
جيش من غير شعب
مايمشيش

1968م

[اعلى الصفحة](#)

الشيخ عاشور

سلام مربع يا بلد
للشيخ عاشور
قلب الاسد
سلام يا واد
على دا ودا
لو دسته منه
فى البلد
ما كانش كان
كل اللي كان
ولا كان دا حالك يا بلد
مدد يا شيخ عاشور
مدد
مدد يا شيخ عاشور مدد

القاهره / 1968

[اعلى الصفحة](#)

دعوة

يا خالقنا وعالم بلاوينا
يا رازقنا
وحاسب خطاونا
نسأل فضلك
من إحسانك
يظهر عدلك
وبسلطانك
يطلع فلاح من وسطينا
يزعط أفندينا
وحرامينا

القاهرة / 1986

اعلى الصفحة

يا مصر

فلاحينك هما هما
فلاحين رمسيس وخوفو
جيش
لا عيش ولا زمزميه
فى الهجيره تبل جوفه
المرض للموت يجرة
وهو ماشي
يجر خوفه
أعمى
سالك سكه عتمه
خطوته
على قد شوفه

معتقل القناطر / 1970

اعلى الصفحة

آخر الكلام

واه يا خي اه
ياخي
كنا نملا الدنيا ضي
بس اه
لو كنا زي
الف اه
واه يا خي كنا جبنا الشمس
من برج الاسد
واديناها للعيال
غزل البنات
يطبعوها ع الهدوم
والكراسات
يشبكوها
ورد شعور البنات
ينظموها
عقد من شر الحسد
يضوي نوره
لما يضوي

كل حاره وكل حي
بس اه لو كنا زي
الف اه
واه ياخي
كنا المظلوم اذا هاجم
جري
كنا لو كان السلاح فى يدنا
والمعارضه
يد واحده عندنا
دسنا شاهنا
وامريكاته بنعلنا
وابتدينا الثوره
من اوسع طريق
كان تمتاشر يناير
ف الشوارع لسه حي
بس اه
لو كنا زي
الف اه
واه ياخي

[اعلى الصفحة](#)

الخط دا خطي

الخط دا خطي
والكلمة دي
ليا
غطى الورق غطي
بالدمع يا عنية
شط الزيتون شطي
والارض عربية
نسايمها انفاسي
وترابها من ناسي
وان رحت انا ناسي
ما تنسانيش هي
والخط دا خطي
والكلمة دي ليا
لاكتب على عيني
يحرم عليكى النوم
واحبس ضيا عيني
بدموعى طول اليوم
قبل الوفا بديني
زي الصلا والصوم

والدين فى عرف الحر
هم ومذلة ومر
وشجون تصون وتجبر
احزان مخبية
والخط دى خطي
والكلمة دى ليا
لاكتب على كفي
والحبر من دمي
ياهمتي كفي
يا عزوتى ضمي
اول ما ح نوفي
بالوعد
ح نسمي
باسم اللى ماتوا صغار
فى المدرسه والدار
والمصنع اللى انهار
فوق الصنا يعية
والخط دا خطي
والكلمة دى ليا

[اعلى الصفحة](#)

بلح ابريم

يابلح ابريم يا سمارة
سواك الهوى ف العالى
هويت
على طمى النيل ياسمارة
وشربت عكار
لما استكفيت
بس اخلويت قوي يا سمارة
لما اسمريت قوي ياسمارة
لفيت الشارع و الحارة
على زى نقاوتك فين
ما لقيت

يا حلاوة بنار
يا حلاوة بنار الشمس النور
يا سمارة وعمار الصحرا البور
شباك الهوى
داير ما يدور
اتاريك دبت وطبيت
بس اغلويت قوي ياسمارة
لما اتدليت قوى ياسمارة

ونزلت الشارع الحارة
سوقك
لا رخصت ولا اتذليت
يا بلح ابريم
ياسمارة

حصنت بعقدك صدر الناس
من شر النخاس الخناس
ياجو قلب لا سوسه
ولا سواس
ورقيتك يا اسمر
واسترايت
الضم حبابيك بقي ياسمارة
وافتح شبابيبك لقا يا سماره
على جو الشارع
والحاره
تحلو زيادة
وتملا البيت
يا بلح ابريم يا سماره

[اعلى الصفحة](#)

الحمد لله

الحمد لله خبطنا
تحت بطاطنا
يا محلا رجعه ظباطنا
من خط النار
يا اهل مصر المحميه
بالحراميه
الفول كتير والطعميه
والبر عمار
والعيشه معدن واهي ماشيه
اخر اشيا
مادام جنابه والحاشيه
بكروش وكتار

ح تقول لى سينا وما سينا شي
ما تدوشناشي
ما ستميت اوتوبيس ماشى
شاحنين انفار
ايه يعني لما يموت مليون
او كل الكون
العمر اصلا مش مضمون

والناس اعمار

الحمد لله وأهي

ظاظت

والبيه حاظط

في كل حته

مدير ظابط

وإن شالله

حمار

ايه يعني في العقبة جرينا

ولا ف سينا

هي الهزيمة تنسينا

اننا احرار

ايه يعني شعب ف ليل ذلة

ضايح كله

دا كفاية بس اما تقول له

احنا الثوار

الحمد لله ولا حولا

مصر الدولة

عرقانة في الكذب علاوله

والشعب احتار

وكفايه اسيادنا البعدا

عايشين سعدا

بفضل ناس تملا المعده

وتقول اشعار

اشعار تمجد وتماين

حتى الخاين

وان شا الله يخربها مداين

عبد الجبار

القاهره / يونيو 1967

اعلى الصفحة

كلب الست

في الزمالك

من سنين

وف حما النيل القديم

قصر

من عصر اليمين

ملك واحدة من الحرير

صيتها اكثر م الادان

يسمعوه المسلمين
والنتر والتركان
والهنود والمنبوذين
ست فاقت ع الرجال
فى المقام والاحترام
صيت وشهره وتل مال
يعنى فى غايه التمام
قصره يعنى هى كلمة
ليها كلمه فى الحكومه
بس ربك لجل حكمه
قام حرمها م الامومه
والامومه
طبع ثابت
جوه حوا من الزمان
تعمل ايه الست
جابت
فوكس رومي وله ودان
فوكس دا عبقال املك
عندة دستة خدامين
يعنى مش موجود فى عيلتك
شخص زية يا اسماعين
واسماعين دا يبقى واحد
م الجماعة التعبانين
اللي داخوا فى المعاهد
والمدارس من سنين
حب يعمل واد فكاكة
يمشي حبة فى الزمالك
والقيامة والفتاكة
يرموا طبعا ع المهالك
عم سمعة من قيامتة
حب يعمل فيها فلة
بعد ما الوظ بيجامتة
اشترى حنة مجله
قول مشي يقرا فى حكاية
من حكايات الغرام
واندماجة فى القرابه
خلا مشيه مش تمام
ع اليمين يحدف بعيد
خطوتين ويروح شمال
لمحه فوكس من الحديد
قال دا صيد
سهل حلال
هب نط فى كرشه دوغري
جاب بيجامته لحد ديها

اسماعين بڤال ما يجري
قال يا رجلي
رجلى مالها ؟
بص شاف الدم سايح
من عاليها ومن واطيها
وياللى جاي
وياللى رايح
المجله مش لا قيها
حبه واتلموا الظنايا
اللى هما البوابين
والحكاية والروايه
قال لهم
دا كلب مين
كلب مين
ما كلب مينشى
سمعه لبخ حبتين
قال واحد منهم
امشى
اللى جابك عنده مين؟
قال دا شارع يا مواشي
والجميع بيمر منه
اللى راكب
اللى ماشى
مستحيل نستغنى عنه
كلمه من دا
وكلمه من دا
ظاظو واترسمت فضيحه
قول نهايته
القصد من دا
اسماعين اكل الطريحه
راحو قسم الشرطه طبعاً
والنيابه كفيله بيهم
واترموا فى الحجز جمعاً
لما ييجي الدور عليهم
حبة والشاويش امين
قال : سعيد النقشيني
قام غريم عم اسماعين
قال لة:
محسوبك يا افندي
قام سي سمعه
يروح معاه
الشاويش قال :
غور بدمك
راح تعوصنى

وفوق قفاه

كف طرّقع

داهيه ف امك

تفتكر بفضل سي سمعه

قد ايه فى القسم نايم ؟

استضافه الحجز جمعه

يا بلاش

ادي العزائم

شاف بلاوي

ما تتحكيش

م الديابه المسجونين

قال يا عالم

يا شاويش

يا نيايه

يامسئولين

خلصوه بعد المناهده

جئه من جحر الديابه

هى يمكن ساعه واحده

كان فى مكتب النيايه

قال له مالك يا اسماعين

قال لة زي البمب ... مالي ؟

قال له عضك فوكس فين

قال له سيبنى اروح لحالي

انت شوف سي فوكس يمكن

خد تسمم

غصب عني

الوكيل قال برضة ممكن

والشاويش

قعد يغنى

انت فين والكلب فين

انت قدة يا اسماعين

طب دا كلب الست يا ابني

وانت تطلع ابن مين

بشري لصحاب الديول

واللى له اربع رجول

بشرى لسيادنا البهايم

من جمايس او عجول

اللى صاحبه يا جماعه

له غناوي

فى الاذاعه

راح يدوس فوق الغلابه

والنيايه .. بالبتاعه

شجرة لو

يا امانى يا شجره ف بستانى
بتفرع يا ما وتعلو
وبيستناها الفكهاى
ولا تطرح غيركلمه لو
لواغمض وافتح تانى
الاقينى طاير فى الجو
والشمس عروسه مقابلاى
بالطرحه الذهبى وبالضو
لاخطف طرحتها وفرحتها
وانزل فى اللحظه وفى التو
ابدرا نورها واشواقى
ع الارض تنور تحلو
والمس بالكف المتحنى
ع الزرع يبشر ويمنى
والحب يرعرع
ويغنى
والعمر يهنى
ويغلو
ويقوموا الناس فى الفجرىه
والصبح بيضحك ها او
والليل بعيونه الحراميه
بيعيط خايف م العو
وامانى كثيره مشاغلانى
ممكن تتحقق يوم او
على راي صاحبنا البستانى
لو تطرح يوم شجره لو

القاهره / 1967

أول كلام

كلامنا عن ايران
ما لوش طبعا مكان
فى اعلام الخيانه
وصوت الامريكان
لان الامن شايف
بان الأخ خايف

ليلرق على الشفايف
ويلبس فى الودان
كلام عن الخيانه
ومن عالم جعانه
فتظهر الادانه
على الشاه اللي خان
ادانه يعنى ثوره
ما تقبلش المناوره
وفضح وكشف عوره
واخر بهدلان

فليه الامن يرضى
بيحب للمعارضه
دى عالم يابا مرضى
واغلبهم جعان
وهكذا الطريقه
طناش
على الحقيقه
فتبقى الناس
غريقه
وتسمع شقلبان

لهذا
او لذلك
حنمشى فى المسالك
ونطلع م الزمالك
نخش الترجمان
وكلمتنا نقولوها
حليب من بز أبوها
فناسنا يسمعوها
فيحصل بغبغان
فهاات ودنك يا خلي
اقولك وانت قوللي
وسيبك م اللي واللي
ونحكى
عن ايران

[اعلى الصفحة](#)

اصحى يا مصر

اصحى يا مصر
اصحى يا مصر
هزى هلاك

هاتى النصر
كونى يا مصر وعيشي يا مصر
مدي اديكى
وظولى العصر
اصحي وكوني وعيشي يا مصر

اصحى يا عامل مصر يا مجدع
وافهم دورك
ف الوردية
مهما بتتعب
مهما بتصنع
تعبك رايح
للحراميه
جهدك عملك
رزق عبالك
عرقك مرقك
ولا يهنا لك
اصحى يا عامل
غير حالك
صون المصنع
واصنع مصر
اصحى وكونى وعيشي يا مصر

اصحى يا زارع مصر الخضره
قدره وخضره
ونور وجمال
ابدر غيظك
واحمي البدره
ضد الافه
والاستغلال
ارضك عرضك
باب الدار
صبحوا مداسه
للسمسار
نعطش
ولانشر بش عكار
وصفه قالوها الحكما يامصر
اصحى وكونى وعيشي يا مصر

واصحى يا جندي
يا تار الشهدا
عمى وخالك
احتى واخوك
لجل ما تهذا وتارك يهدا
فرغ نارك ف اللى خاتوك

يا بن الشعب يا حامي الشعب
انت املنا في يوم الصعب
اصحى يا جندي ودق الكعب
حرر مصر وطهر مصر
اصحى وكوني وعيشي يا مصر

[اعلى الصفحة](#)
